

MINĒ BDEED DIOS DIIDZ

GON JUAN

1 Nu raquiet grē ncuaañe ziaadyoble gac. Dios bnabey Jesús glu mew lo grē zha ne no xnēz me. Nacne pxeel Jesús tib xanj̄l me biaad biaadluw lo ngundziin win ne nac naa nu, parne sca gacnañ zhow.

²Grēse minē gon naa, grēse minē bin naa ga, laaw gne naa zigne gonse naaw, zigne binse naaw. ¡Diidzliw!

³Dichos grē zha ne glab lo guits rii, ni dichos grē zha ne yquiaadiag grē minē zhobnee low nu, ycaania zhow ni gliladz zhow; sac gon xtiidz Diosa, ni laa dze ne gac grē minē rzeeta nu, ziaadgaxle.

⁴Naa nac Juan, laa naa rquia guits rii rxel̄ naa ziaad lo to i, ne nac to zha ne ngab xnēz Jesús, zigne nose to gza gadz guiedz ne ndxie nēz Asia i.

Dios men̄ ne no padzeela, men̄ ne no niina, men̄ ne nacle diidz guiaad, me gacniēn̄ to lo grē zhizhgab to, me cchoobladz zdoo to peet tsienied guic to; me ni Espíritu ne zo lo me zaatne nac lo xcan ndzon ne zob me; Espíritu ne rlu zha nac gadz guiel̄biini ne rap me; ⁵ni Jesús men̄ ne rnee niapse diidzli, men̄ ne glopaa brieēban lo guiel̄gut, men̄ ne rnabey lo grēse zha non ne rnabey lo guidzliu.

¡Gotsaa dziuun̄non ne Jesús! Sac gon̄ pa lotaa rleynie me ne, bleeladz me me bzhiee xchen me psan̄mbe me ne lo grētaa xtol̄ ne, ⁶tibaque been̄ me ne, psan̄non me ne; bzooblo me ne gac ne pxoz ne gun̄ dziin lo Dios men̄ ne nac Pxoze me. ¡Mese nac men̄ ne rap guiel̄ndzon, mese rap grētaa guiel̄rnabey! ¡Tsod cho stib zig me, ni gdziñd̄ dze ne nitlo xquiel̄rnabey me! Sca nac me.

⁷¡Bii zanaque to gan̄le zeēne laa Jesús ziad-zēēb lo xcow! Grēse miech zan̄ zho me, zig nac zha ne sca bdiñ me, zha ne sca bliz lanz cue me, zan̄lo zho me; dibdoo guidzliu, hor co mbanse gac miech, haxta zoon zho, haxta zdzieb zho. Ible sca none gaca.

⁸Znu rnee Dios, men̄ nroob ne rap grēse guiel̄rnabey: “Grēse ncuaañe notaa, naa psilow ni naa csiaała; naa nac zigne nac letr “a” ni letr “z” lo grēse letr, “a” rsilow, “z” riala, zigne nac naa niina sca goc naa padzeela, ni scaque gac naa zeēne laa naa guial̄ stib.”

Goñ Juan Jesús

⁹Naa nac bets to Juan, tibaque nac ne niina grē ne, sac ye naa no xnēz Jesús; ye naa nodeed grē guieInē ne noded to. Zigne rneedz me paciens lo to lēb to lo grētaa guieInē ne no gan to, scaque racniēn me naa; ni ye naa gdziñ lo me, zaatne no gdziñ to.

Sodiidz naa lo to ganle zha bzhaac naa. Lēētaque no naa lo guidzliu win ne lē Patmos, ga ngoguiu zho naa loxaque ne noseed naa miech Xtiidz Dios, mine biaadlu Jesús zeēne biaad me lo guidzliu. ¹⁰Tib dze, lēētaque nacie Espíritu Sant naa nozodiidznie naa Dios, tibaque zeēne nguiedz zēēb tib tsi men co, pale tsi tib trompet; ¹¹nē me lo naa:

—Grētaa ncuaañe ran luu nu niina, pquiaaw tib lo guits pxeela lo grēse zha ne ngab lo naa, grē zha ne no gza gadz guiedz rii nēz Asia: Efés, Smirn, Pérgamo, Tiatur, Sardis, Filadelf, ni Laodicé.

¹²Ptsire lo naa ni naa gwi naa dien cho ga sca rnee lo naa. Zeēne bui naa, gon naa gadz candeler niaa niapse guiib or. ¹³Glowtaa lo gza candeler co zo tib mgui zigne rlu miech lo guidzliu rii, nacw me tib lar nool rdzina haxta yan ni me, ni ndxie tib cinch niaa niapse guiib or ngali ro zdoo me. ¹⁴Ine bie rna guitsguic me, zootle zhiil nquits, zootgaa luu guieg, masaque riaazbel bziaalo me. ¹⁵Ni mew, masaque rquiabniw zigne rquiabni guiib brons zeēne rlozh riaanmbew, zeēne rrieenēzgaaw lo gui; tsi mew, masaque rio bi rnee me zig rio bi grē guiebee nroob ne zhoob naal nis. ¹⁶Nia me mine nēz derech, nzhen me gadz mel gbaa; ni zob tib spad ro me, zigtaa nēz zhits spad cow zigtaa nēz low, gropse nēza ndox. Masaque biinidoo ne rriee lo me, zigne rlu lo ngbidz zeēne lega recye lo ngbidz.

¹⁷Zeēne gon naa me, mbe biaab naa zhan ni me zig tib zha ne gutle. Dzigo blis me nia derech me pxobnia me guic naa, nē me lo naa:

—¡Gdzieebd luu! Naa psilo ni naa csiaal, naa psan grētaa ncuaañe no, ni naa gnitlow; ¹⁸ni mban naa. Nli gut naa per briebaan naa, mban naa niina, ni gdziñdraa dze ne guet naa; ladznia naa no guielgut. ¡Gdzieebd luu sca! ¹⁹Grēse ncuaañe noyan luu nu niina, pquiaaw lo guits grēsew, niicle mine noyaclew, mine naragaa gaca. ²⁰Znu gon nac mine blozh gon luu ga: gadz mel gbaa ne gon luu nzheen naa ga con nia derech naa, tib tib mel co nac tib tib zha ne quianap yadoo ne no gza guiedz co; laa gza gadz candeler co, nac tib tib yadoo co.

Diidz ne bnee Jesús lo zha Efés

2 Blozh ga nē me lo naa:

—Mine gni naa lo luu nu niina, pquiaaw pxeela Efés, lo zha ne quianap grē zha ne ngab xnēz naa ga, gudz lo zho: “Znu nac xtiidz men ne nzhen gza gadz mel gbaa co, men ne zodeed vuelt lo gza gadz candeler ne niaa niapse guiib or ga, rnee me:

²Nan naa zha mban to, nan naa pa lotaa noxco to run to xtsin naa, ni nacle to zha ne lega znuse guiaan zdo; stiba, ib randzede to grë zha ntseeb. Grë zha ne ziyaad i rnee zho Dios pxeel zho ziadnee zho xtiidz me, per pquia to been to zho prueb, haxta gocnan to rquidie zho. ³Nan naa zha nactaa guielnë ne noded to loxaque ne riladz to naa; per niicle scaw tibaque dziits zo to, ib riaand zdo to.

⁴Loxaque naca no tib ncuaane glisqui naa lo to: ¡Rleyniedraa to naa niina, zigne rleynietaa to naa glo, zeene glopaa bliladz to xtidz naa! ⁵Golsoladz pa lo pxin to. Golbiire golgac stib zigne nac to glo zeene psilo bliladz to xtidz naa; sac gon, telne gac-wende to, ible zial naa i zialtichee naa xcandeler to zaatne zow.

⁶Nli rleyniedraa to naa scataa, per rley naa ran naa ib rdziguiende to grë ncuaane ndzinlid ne run zha Nicolaít, sac tel naa, ni lalnu ib rdziguiend naa ncuaane run zho.

⁷Zha ne rioguicle godiidz rii, yquiaadiag zho ganle zha rnee Espíritu Sant lo grë zha ne no xnëz naa, rnee me: Grëse zha ne gdeete diidz gac-wet zho lo ncuaane gunctal xtol zho, zha co ygaa gow xnex yag ne rdeed guielmban ga, mine zob len huert ndzon ne rap Dios ga.”

Diidz ne bnee Jesús lo zha Smirn

⁸Blozh ga në me lo naa:

—Pquiaa mine gni naa lo luu nu, pxeela Smirn, lo zha ne quianap grë zha ne ngab xnëz naa ga, gudz lo zho: “Znu nac xtiidz men ne psilo grëtaa ncuaane no, men ne csiaala, men ne gut ga ni brieeban me, rnee me:

⁹Ran naa zha nactaa grë guielnë ne noded to. Ran naa mban rac to guien grë ncuaane yquiin to (nligaa peet rapde to lo guidzliu, per guielnzaac ne bgaa to i ngab to lo Dios, nroob nona). Ran naa, grë zha ne rnee i xpëed Dios zho sac zhasi zha Israel nac zho, no zho rneenë zho to; per nlid gon xpëed Dios nac zho, sac zhiwseed mendox zianal zho.

¹⁰Nroob grë guielnë ne ziaadyob gan to, per gdziebde to. Squiil mendox miech, gnab zho tso to ladzguiib; ga nagon glu to dien pe nli dib zdo to riladz to naa. Nli nzianlaa to guiab ladzguiib, per tib tsiise ngbidz sca yquiaanal zho to. Laga mban to lo guidzliu sca, ible csaande to zhiwseed naa, zeena ycaania to guielmban ndzon ne gnedz naa lo to.

¹¹Zha ne rioguicle godiidz rii, yquiaadiag zho ganle zha rnee Espíritu Sant lo zha ne no xnëz naa, rnee me: Zha ne tiblrique tsoxco gun mine rnabey Dios, led yedraa zha co tsoxtseeb guey gabil.”

Diidz ne bnee Jesús lo zha Pérgamo

¹²Blozh ga, nëque me lo naa:

—Mine gni naa lo luu nu, pquiaaw pxeela Pérgamo, lo zha ne quianap grë zha ne ngab xnëz naa ga, gudz lo zho: “Znu nac xtiidz men ne nzobro tib spad lots ne ndox gropsse nëz, rnee me:

¹³'Nanpaa naa masaque mendox rnabey lad guiedz ne no to i, per ran naa tiblifique dib zdoo to rnalo to naa, niicle gon to zha psacsi zho Antip, beet zho me i, men ne scataa bioxco bnee xtidz naa lo miech.

¹⁴'Per no chop ncuane gon glisqui naa lo to: Lëda i run to randze to grë zha ne squi run zigne been Balam, men ne pquiil Balac bloo Balac guic grë zha Israel beenctal zho xtol zho, dow zho xpëel grë ma ne biogon lo mdio, ni pquiangob zho zha ne led tsieeld zho. ¹⁵Lëe tiba ga, laa stiba, randze to zha ne bii zienal zhiwseed yozh zha nicolaít; tel naa, ni lalnu rdziguierend naa wseed co.

¹⁶'Laa naa rso diidz lo to: golnab perdon, ni golnee lo grë zha co csaan zho grë ncuane ndzinlid ne run zho; sac gon, telne gond zho diidz, ible zial naa zialtlinie naa zho con spad ne zob ro naa nu.

¹⁷'Zha ne riogucle godiidz rii, yquiaadiag zho ganle zha rnee Espiritu Sant lo grë zha ne no xnëz naa, rnee me: Zha ne gdeete diidz lo grë ncuane gunctal xtol zho, zded naa guielwagw ne rap naa gbaa yquiiin zho; ni zded naa tibga quie nquits lo zho, lo quie co quia lë cub zho, ni zhase gacnan zha nac lë co zho."

Diidz ne bnee Jesús lo zha Tiatir

¹⁸Blozh min co, në me:

—Ye lo zha ne quianap zha ne no xnëz naa guiedz Tiatir, pxeel diidz rii, gudz lo zho: "Znu nac xtiidz Xpëed Dios, men ne masaque riaazbel bziaalo, men ne masaque rquiabni ni zigne rquiabni guiib brons ne tibaque riar; rnee me:

¹⁹'Nan naa grëse zha mban to; ran naa pa lotaa rleynie to naa, dib zdoo to riladz to cho nac naa, noxco to quiayun to xtsin naa, tiblifique rac to dziits zo to lo xtidz naa; ran naa noxcoraa to quiayun to xtsin naa niina.

²⁰'Per no tib ncuane no glisqui naa lo to: lëda i gon run to randze to wnaa ne lë Jezabel i, rnee me Dios rsiaab guic me grë ncuane rnee me, per nlida; sac gon, loxaque noquidie me grë zha ne no xnëz naa, noquiil me zho rquiangob zho grë zha ne led tsieeld zho, ni row zho xpëel grë ma ne riogon lo mdio. ²¹Blactaale pquiambëz naa nab me perdon, ntsëe me lo xquielmban me; per nëd me csaan me grë guielyozh ne run me i.

²²'Gacnan to sca ganle, laa naa gnabey glan me tib guielguidz dox, tsiechedraa me lo caxtigw co; scaque grëse zha ne zienal zhiwseed me, nroob guielnë ne gnabey naa ted zho, tel laa zho csaand grë guielyozh co. ²³Ni haxta zut naa zho, zeena sca gan grëse miech ne no xnëz naa ganle, naasi nan naa pe rza guic miech, pe rza zdoo zho; gacxe waa, tel pe ncuane run zho, zdedse naa mine rieguial zho tib tib zho.

²⁴'Sangue to grë to zha ne zienald guielyozh ne rlu wnaa qui (wseed ne rnee zho i rdeed nroob guielbiini, per nand zho gon zhiwseed mendoxa), peet glisquidraa naa lo to. ²⁵Per none gon tiblifique golgac, zeena ine dib zdoo to rnalo to naa gal dze ne laa naa guial stib. ²⁶⁻²⁸Sac gon, grëse zha ne gdeete diidz lo grë ncuane gunctal xtol zho, sinque tibaque tsoxco zho gban zho

zigne rnabey naa, haxta gdziñ dze ne nitlo guidzliu, zded naa tib mel gbaa lo zho, mel ne rlan raḷ sil, ni so naa zho gnabey zho grē guiedz. Naa gded guieḷrnabey co lo zho, zigne bneedz Pxoꝝ naaw lo naa; ni lalnu yquiad zdoꝝ zho, grēse miech ntseeb, zunquizh zho zho grētaa guieḷntseeb ne been zho.

²⁹Grēse zha ne rioguicle godiidz rii, yquiaadiag zho ganḷe zha rnee Espíritu Sant lo grē zha ne no xnēz naa!”

Diidz ne bnee Jesús lo zha Sardis

3 Blozh ga, nē me:

—Mīne gni naa lo luu nu, pquiaaw pxeēḷa guiedz Sardis, lo zha ne quianap grē zha ne ngab xnēz naa, gudꝝ lo zho: “Znu nac xtiidz meḅ ne nzhēn gadz mel gbaa, meḅ ne nacie zhiEspíritu Dios, Espíritu ne rreed gadz guieḷbiini, rnee me:

¹Naḅ naa gon pe nac grē ncuane ruḅ to, niicle zēēb diidz mban to, per par naa miech gutle nac to. ²Goḷcúee zhimcaalo to sca! Goḷsodziits lo spalalse xtiidz naa mīne rsoladz to, sac gon zhile laa to lozh guiaanladza. Ne nligaa, raḅ naa quiaꝝnde to xtsiḅ Dios zig none gaca. ³Goḷsoladz ganḷe zha nac grē wseed ne gocnaḅ to, grē wseed ne bin to; dzigo goḷtsienala, ni goḷnab lo Dios guḅ me to perdon. Sac gon, teḷne tsienalde tow, zeene laa naa guial, lega nacle zeene gan to laa naa zole lo to; zig rzac zha ne rzēēb ngbaan lidz.

⁴Sca nac to, per lo to i gon no bla zha ne bii mbe zdoꝝ, sac zienald zho grē ncuane ruḅ to; rrieequia rdeete zho diidz guiacbeed xab nquits zho ga. Ni zha co nagon rieguiaḷ sēnaḷ zhits naa, sac gop zho xab zho cuidad.

⁵Goḷgona ganḷe, grēse zha ne gdeete diidz lo grē ncuane guncḷal xtoḷ zho, scaania zho tib lar nquitsbie gacw zho; lē zhow, lēē quialew lo guits ne quia lē grē zha ne yгаа tib guieḷmban ndzon ga; haxta zanie naa zho lo Pxoꝝ naa ni lo grē xanjḷ me, guiep naa: Lēē zha rii gon no xnēz naa.

⁶Zha ne rioguicle grē godiidz rii, yquiaadiag zho ganḷe zha rnee Espíritu Sant lo grē zha ne ngab xnēz naa.”

Diidz ne bnee Jesús lo zha Filadelf

⁷Blozh ga nē me:

—Mīne gni naa niina, pquiaaw pxeēḷa guiedz Filadelf, lo zha ne quianap grē zha ne ngab xnēz naa, gudꝝ lo zho: “Meḅ mbe ne rapd ni tib doḷ, meḅ ne rnee niapse diidzli, meḅ ne rnabey zigne bnabey rey David; zaatne rxal me, tsod zha ne grieelo csiooga, zaatne csiooggaa mew, tsod zha ne grieelo cxala; znu nac xtiidz me, rnee me lo to:

⁸Naḅ naa grēse zha mban to; niicle ne squi bii nsis rac to, per rioꝝco to ron to xtidz naa, ni rqueetsde to ne nli rliladz to naa. Gacxe waa, rrieequia laa naa rxal tib puert ted to, ni choot grieelod csioog puert co. ⁹Bii zaḅ to ganḷe, zeene laa naa cxel gza zha ne ngab lo mendox i, guiaad zho guiadquitsgzhīb zho lo to, zha ne noquidie i rnee zho xnēz naa no zho. Ga gan zho ganḷe nli rleynie naa to. ¹⁰Ne squi tiblque rac to ron to xtidz naa, peet güeynied guic

to niicle pquianaḷ miech to, ible squianaap naa to, gaṇde to guieḷnè dox ne gaṇ grè miech ne ndxie lo guidzliu.

¹¹'Golṣoladza gaṇle, merle guiaḷ naa. Golṣuien csaande to xtidz naa miṇe naṇle to, zeena tsod stib zha ne ctiche miṇe rieguaḷ to gnedz naa lo to. ¹²Grèse zha ne gdeete diidz lo grè ncuaaṇe guṇctal xtol zho, so naa zho gac zho zig grè pilar nroob ne zo leṇ xyadoo ro Dios, ni gdziṇdraa dze ne greee zho ga; cho pilar co, ga yquia naa lè Dios, ga yquia naa tib lè cub naa. Laa zho ngable guiedz ne rnabey Dios ga; lèè guiedz co nac Jerusalén cub ne gnabey me quiet gbaa.

¹³'Zha ne rioguicle godiidz rii, yquiaadiag zho gaṇle zha rnee Espíritu Sant lo grè zha ne no xnèz naa."

Diidz ne bnee Jesús lo zha Laodicé

¹⁴Ni nè me:

—Miṇe gni naa niina, pquiaaw pxeela guiedz Laodicé, lo zha ne quianap grè zha ne ngab xnèz naa ga, gudz lo zho: "Meṇ ne rnee niapse diidzli, meṇ ne ruṇ grèse miṇe rnabey Dios, meṇ ne bzo Dios psan grèse ncuaaṇe no, znu nac xtiidz me, rnee me lo to:

¹⁵Naṇ naa grèse zha mban to. Raṇ naa noxcodé to grè miṇe rnabey naa to, ni niicle rsaandga tow; nac to zig nac tib ncuaaṇe loxaque ndzèyopse, niicle niagda ni niicle nlèèdgaaw. ¡Tebaa nac to zig tib nis yag, zig tib nis lèègaa!
¹⁶Per na gaṇ ne squi nac to zig tib nis ndzèyopse, ni lalnu rdziguiend naa ncuaaṇe ruṇ to. ¡Zhile gaṇ laa to guṇctasib naa!

¹⁷Rnee to grèse ncuaaṇe rquiin to laaw quianiele to, ible peet liaadz racdraa lo to, ¡ni riende to gaṇ ni lalnu peet nonde to! To nac miech ne mazdraa mban, peet rapde to, ni lar ne ctse lad to guieṇd, rriequia haxta ni lo to roldraa. ¹⁸Laa naa rso diidz lo to: Teḷne racladz to nlipaa gapchen to, goltè lo naa, naa cto guieb or ne mazdraa wen lo to; xab tow, naa cto lar ne mazdraa nquits gacw to, zeena cto ladzniedraa to to ne squi guieṇd pe ctse lad to; haxta nis rmed ne tso bziaalo to, naa gnedza, zeena gbiire gaṇ to stib.

¹⁹'Grè zha ne rleynie naa, rliquis naa grè ncuaaṇe nonguield ne ruṇ zho, rteed naa zho tib caxtigw parne cseed zho ndzinli gban zho; gacxe waa golgac ndzinli stib, goltsoxco miṇe rnabey naa. ²⁰Laa naa quiambèz to gaṇ gbiire gbig to lo naa. Rriequia ro lidz to zo naa, quiabedz naa to. Zha ne yquiablazd cxal ro lidz sèèb naa, zdeed naa, ni haxta sobnie naa zho diowxtsee no grop no. ²¹Grèse zha ne gdeete diidz lo grè ncuaaṇe guṇctal xtol zho, zded naa diidz sob zho cue naa, zaatne sob naa gnabey naa; zigne zoob naa cue Pxoza naa niina nonabey no; sac teḷ naa, bdete naa diidz niun naa miṇe rnabey mendox.

²²'Zha ne rioguicle godiidz rii, yquiaadiag zho gaṇle zha rnee Espíritu Sant lo grè zha ne no xnèz naa."

Roolnie zho Dios gbaa

4 Zeene bui naa stib, gon naa laa tib puert quia zhan gbaa, nzhialse puert co. Hor co biire bin naa tsi men ne bnee lo naa ga glo, men ne nac tsi ga zig tsi tib trompet, në me:

—Biep, dë nu ganle, zeena glu naa lo luu zha nac grë ncuane ziaadyob gac.

²Zigne sca në me, hor co blu Espiritu Sant lo naa, gon naa laa tib xcan zo gbaa, tib xcan ne rzob men ne rnabeya. Lo xcan co, ga zob tib men co, ³masaque rbebni me zigne rbebni quie ne rnee zho jasp, quie ne rneegaa zho cornalin. Igose xcan co quia tib guitye, rbebniw zigne rbebni quie ne rnee zho smerald; ⁴ni zo zgalptap xcan igow, tibga mengol zob tib tib lo xcan co, dib nquitsbiese rna xab me, ni zob tibga coron or guic me. ⁵⁻⁶Masaque riab belye, ratsie rnee nguzi, ni zëëb tsi miech zaatne zo xcan ne riaan glowtaa ga. Zaatne nac delant lo xcan co, masaque rluw zig rlu lo nisdoo ni rbelala zig rbelal quie zed; ni noquia gadz biini nroob ga, lëë gadz biini co nac gadz guielbiini ne rap Dios.

Igo xcan co, ga zo tap bult mban, tibgaw zo tib nëz; nëz low, nëz zhitsaquew zob bziaalow. ⁷Tiba rlu zig rlu meedz, stiba rlu zig rlu tib ngon yeen; laa schop mine riaan ga, tiba rac lo zig rac lo miech, laa stiba rlu zig rlu tib msi nroob ne quiasibe. ⁸Tib tiba zob xoopga xiila, ndziib bziaalow zhits xiila, len xiila ne; tibaque nguiedz zëëb tsiw, rneew:

¡Men ndzondoo nac Dios!

¡Men rnabey nac me, nroob poder ne rap me!

Notaque me, me ga no padzeela, me no niina, ni lëëque me ga no guiaad.

⁹Gza tap bult mban co, roolniew men ne zob lo xcan co, (men ne gdziñd dze guet) rsannona me, ni rdeeda xquizh lo me. Zigse sca run gza bult co, ¹⁰scasaque gza galptap mengol ne zob ga, rquitsgzhib me lo men ne zob lo xcan ro co, gzase me, rgob me xcoron me rguix mew nëz lo men ne zob lo xcan co, ni rnee me:

¹¹Luu nac xDios no, luu nac men ne rnabey no.

Luuse nac men ne rieguial dziuunnon no,
ni gnee no grë diidz ndzon lo luu.

Nroob poder ne rap luu, sac grëtaa ncuane no, luu bzaaw;
laaw biaa sac ible sca gocladz luu, ni laaw niaagaa niina, sac ible sca
racladz luu.

Tib guits ne nzhidoo gadz lë cint

5 Zeene bui naa stib, gonpaa naa men ne zob lo xcan ro co, nose tib guits nroob nia derech me. Gropse nëz guits co quia, ndibëdsew, nzhidoo gaw gadz lë cint. ²Ni gon naa tib anjl, tib men macis rlu me, nguiedz zëëb tsi me, bnabdiidz me rëb me:

—¿Cho rieguial cchug cint ne nzhidoo guits qui, cxal zho low?

³Ni tib choot pxald lo guits co, niicle gbaaw niicle lo guidzliuw, niicle zhan guidzliugaaw, brieequiad tib zha ne nchug cint co, nwi zho lo guits co.

⁴Mban goc naa, psilo naa nguiedz roon naa, gon naa sca brieequiad tib zha ne rieguial nxaal lo guits co, nlab zho low. ⁵Dzigo bnee tib mengol ne zo gax lo xcan co, në me lo naa:

—Goond luu. Lëz ganle, men ne brieequia lo xtii Judá, lo xtii rey David, me chug gza gadz cint ne nzhidoo guits qui, me cxal low. Ible me rieguiala, sac gon psiaablo me grëse zha ne rlëë lo me; rrieequia nac me zig tib meedz.

⁶Hor co bui naa zaatne nac lo xcan ro co, gon naa glowtaa lo gza bult mban co ni lo gza mengol co, ga zo tib Carner yeen. Rlupaa zha psacsi zho ma, zeene beet zho ma. Zob gadz zhoz ma, ni zob gadz bziaalo ma, rrieequia gza gadz bziaalo ma ga, min co nac gadz guielbiini ne rdeed zhiEspíritu Dios.

⁷Dzigo wbig men ne nac Carner yeen co, bnaaz me guits ne no nia derech men ne zob lo xcan ro co. ⁸Zigne bnaaz me guits co, laa gza bult mban co, ni gza galptap mengol co pquitsgzhib lo me. Tib tib mengol co nzhenne me tib arp ni tib ptsigui or, rso tib gox ndzon len ptsigui co (rrieequia gox co nac grë diidz ndzon ne rnee grë zha ne no xnëz Dios zeene rzodiidznie zho me).

⁹Dzigo psilo gza mengol co biil me tib cant cub. Znu rnee lo cant co:

¡Ible luu rieguial ycaania guits qui, luu rieguial chug gza cint ne nzhidoow i!

Sac luu bded grëtaa guielnë co psacsi zho luu, haxta bzhiee xchen luu; sca psilaa luu grëlose dii miech,

tel pa guiedztaa nac zho, tel pa diidztaa rnee zho, tel pa naciontaa ngab zho.

¹⁰Laa luu bzhii no grë no gac no tib guiedz cub,

guiedz ne gnabey Dios;

no gac pxoz ne gun dziin lo me,

masaque tipse gban no zeene gnabey me lo guidzliu.

¹¹Zeene bui naa, gon naa anjl guizhiu ne ndxie zaatne zo xcan ro co, led zha ne grieelod glab new. ¹²Nguiedz zëëb tsi zho grë zho gza bult mban co, ni grë mengol co, rnee zho:

¡Men non nac men ne nac Carner yeen ne squi rlu beet zho!

Me rieguial gnabey, men ro nac me, choot grieelod csiaablo me.

Ladznia me no grëse guielnzaac, me rap grëtaa guielrien,

Men ndzon nac me, me none dziuunnon ne, me none dzioolnie ne.

¹³Hor co grëse miech, grëse ma, grëse ncuaañe bzaa Dios, zigtaa gbaaw, zigtagaa lo guidzliuw; zigtaa zhan guidzliuw, zigtagaa lo nisdoo; nguiedz zëëb tsi zho, rnee zho:

¡Nliw, men ne zob lo xcan ro qui, ni men ne nac Carner yeen qui, ible rieguial dziuunnon ne grop me!

¡Me rnabey, lo me none gnee ne grëtaa diidz ndzon;

nadzew, gzhew, ni grëragaa izdoo ne ziaadraaw!

¹⁴Pquiab gza tap bult co, rëb zho:

—¡Scaw, sca no gaca!

Dzigo gzase men̄gol co, laa zho pquitsgzhib lo men̄ ne zob lo xcan ro co; psilo zho rnee zho grē diidz ndzon lo me.

Gza gadz sell co

6 Blozh ga, gon̄paa naa zeene laa men̄ ne nac Carner yeen̄ co pchug primer cint ne nzhidoo guits co. Horco laa tib bult mban co bnee; masaque nac tsiw zig rio bi rnee nguzi, nēw lo naa:

—¡Dē gan̄le gwi luu!

²Dzigo wbig naa, gon̄ naa tib guay nquits. Zhits guay co zob tib men̄ co nzhen̄ me tib yag arcw ne rquiaa zho flech; blozhse pcaania me tib coron ne rzob guic zha rnabey, dzigo laa me briece. Ine zob nzē me lad guay co, laa me zie ziegun̄ me gan lo grē zha ne rlē lo me.

³Blozh ga, laa men̄ ne nac Carner yeen̄ co pchug stib cint ne nzhidoo guits co. Dzigo bredz stib bult co naa.

⁴Dzigo bia naa, gon̄ naa laa stib guay nizhnie briece, zob stib men̄ co lad ma. Blozhse pcaania me tib spad nroob, ni pcaa me diidzbey tsielodil̄ me miech lo guidzliu, zeena gutlsa zho; laa me briece ga, laa me zie.

⁵Zeene laa men̄ ne nac Carner yeen̄ co pchug bion̄ cint ne nzhidoo guits co, dzigo bredz stib bult co naa, nēw lo naa:

—¡Dē gan̄le gwi luu!

Dzigo gon̄ naa tib guay ngas, scasaque zob stib men̄ co lad ma, nzhen̄ me tib zhiguiib. ⁶Ni grol̄taa zaatne zo gza bult mban co, zēeb tsi tib men̄ co, rnee me:

—Tib kiltaa zhobxtil gon̄ ycaa zha ne gun̄ dziin tib dze; tel̄ zhobgaaw, tsontaa kila ycaa zho; sangue nceit ni vin ib ygaald̄ luuw.

⁷Laa zeene goc cint co tap ziechug men̄ ne nac Carner yeen̄ co, dzigo laa stib bult mban co bredz naa.

⁸Hor co, zeene bui naa, gon̄ naa tib guay nguets; lad guay co zob tib zha co lē Guiel̄gut; zhiits co nal̄ stib zho lē Gabīl. Lo tap lal ne nlē miech ne ndxie lo guidzliu, pcaa grop zha co diidzbey tsiegut zho tib lal grē miech co; zha ne guet lo dil̄, zha ne guet lo gbin, zha ne guet lo guiel̄guidz, zha ne guetgaa lo grē ma ntseeb.

⁹Dzigo pchug men̄ ne nac Carner yeen̄ co stib cint co, goca gaay. Hor co, zaatne nac zhan mezh ne nac mezh lo pcoog, ga gon̄ naa grēse zha ne psacsi miech, beet miech zho loxaque ne bnee zho Xtiidz Dios, ni dib zdoo zho bliladz zhow. ¹⁰Nguiedz zēeb tsi zho rnee zho:

—Luu ne nac luu men̄ nroob ne rnabey, luu ne nac luu men̄ ne rnee niapse diidzli, ¿pa hor dzigo cuedz luu grē miech ne ndxie lo guidzliu, zha ne scataa psacsi no? ¿Pa hor gun̄quizh luu zho grētaa mine been̄ zho ga?

¹¹Dzigo bdeed me lar nquits got zho; rēb me lo zho no cuēz zho zniip, sac grēraa zha ne nacgrē zho ngab zho lo Jesús, no spalal zha ne naraa csacsi miech zigne psacsi miech zho; haxta gza zho dzigo laa me gun̄ guiel̄wxtis.

¹²Blozhse ga, laa Carner yeen co pchug stib cint co, goca xoop; hor co laa tib zho dox bni. Gonpaa naa zeene laa lo ngbidz pcow, zig nac zeen tib lar ngas pquia lo ngbidz; laa mëe zig rludaa ren, sca nizhnie rlu lo mëe; ¹³grë mel ne ndziib gbaa, masaque bliaal ma lo guidzliu zig rliaal grë guigw yeen zeene rriee me dox. ¹⁴Znuse bdibëd gbaa, goca zigne racse grë guits ne rdibëd; grë gui, grë guidzliu win ne no lo nisdoo, nëzrii nëzrec biaanä. ¹⁵Dzigo grëse zha ne nac zha rnabey lo guidzliu, grë zha ne nac zha non, grë zha ne rapchen, grë zha nroob ne rnabey lo menguib, grë zha nroob ne non xtiidz, ni grëragaa miech, niicle grë zha ne run xtsiin beña, niicle grëgaa zha ne run xtsiin zhala, grëse zho biolan, zha ne biolan len grë bliee, zha ne biolangaa len grëraa quie ne no dan; ¹⁶nguedz roptsie zho rnee zho lo grë gui co, lo grë quie co:

—¡Golliaal lad no, golcolan no, zeena gandraa men ne zob lo xcan ro co no! ¡Golcolan no, zeena dziand no grëtaa guielnë ne cxeel men ne nac Carner yeen co! ¹⁷¡Sac nasi laa dze ro co bdzin! ¡Laa guielnë dox co nagon ziaadle! ¡Ncuane lëëbd no low!

Zha ne pcuee lo grëse zha Israel

7 Bded ga, gon naa tap anjl. Lo gza tap lad guidzliu, tibga anjl co zo tib lad nocuëz me me. Wdzeepaaw, per ni tib zhiblag yag rnidraa, niicle lo nisdoo dzese biaca; sac ni palal rriedraa me lo guidzliu.

²Tibaque zeene brieequia stib anjl nëz ne rlan ngbidz, neyse me xsell Dios; nguiedz bnee me lo gza tap anjl co (anjel ne pcaa diidzbeey ga gun guielqui lo guidzliu ni lo nisdoo) rëb me:

³—¡Golcuëz zniip! Gunde to guielqui lo guidzliu niina, niicle lo nisdoo, niiclegaa grë yaga; sac naraa lozh guioquiaa no xsell xDios ne quia grë zha ne run xtsiin me.

⁴⁻⁸Zeene blozh pquia sell co quia grë miech co, bin naa lo grë zha ne ziaad lo xtii zha Israel, rgaa zho tib gayoo chooptap mil:

Tsiipchop mil zha xtii Judá,
tsiipchop mil zha xtii Rubén,
tsiipchop mil zha xtii Gad,
tsiipchop mil zha xtii Aser,
tsiipchop mil zha xtii Neftalí,
tsiipchop mil zha xtii Manasés,
tsiipchop mil zha xtii Simeón,
tsiipchop mil zha xtii Leví,
tsiipchop mil zha xtii Isacar,
tsiipchop mil zha xtii Zabulon,
tsiipchop mil zha xtii José,
stsiipchop mil zha xtii Benjamín.

⁹Zeene bui naa zaatne zo xcan ro co, zaatne zo men ne nac Carner yeen co, miech guizhiu ne gon naa ndxie ga; grë lose dii miech ne ndxie dib lo guidzliuw. Ne nligaa miech guizhiuw, led miech ne lëbd ne glab new; grëse

zho niapse lar nquits nacw zho, ni no tiblëga zin nguia nia zho; ¹⁰nguedz zëëb tsi zho, rnee zho:

Dios, meñ ne rdziuunbey ne, meñ ne zob lo xcan ro qui,
me nac meñ ne psilaa ne lo grëtaa xtol ne;
me ni meñ ne nac Carner yeen qui.

¹¹Hor co grëse anjl ne ndxie igo xcan ro co, igo zaatne zob grë mengol co, ni zo gza tap bult mban co; grëse zho laa zho pquitsgzhìb nëz lo xcan co, haxta bzooblo zho lo liu, rdeed zho xquìzh lo Dios ¹²rnee zho:

¡Scaw! Luu none dzioolnie no,
none tibaque gneedz no xquìzh lo luu,
luu rieguaìl dziuunnon no; sac luu nac xDios no.
Luu nac nac meñ ne rienraa, meñ ne rap poder;
gacxe waa luu none ycaania grëse diidz ndzon,
gzataa dze, niicle nadzew, gzhew, ni grëragaa izdoo ne ziaada. ¡Sca
none gaca!

¹³Dzigo bnabdiidz tib mengol co, në me lo naa:

—¿Pe nan luu sca cho nac grë zha ne nacw lar nquits qui? ¿Pe nan luu pa nëz ziaad zho?

¹⁴Dzigo rep naa lo me:

—Nand naaw. Bzhiguiel bnëw lo naa.

Nëchaa me:

—Lëë grë zha qui gon bded grëtaa guielnë dox ne goc lo guidzliu. Laa zho nacw lar nquits qui, sac wbig zho lo Jesús psanmbe xchen me zho lo dol.

¹⁵Gacxe waa squitaa ndzon ndxie zho gax lo zhixcan ro Dios, dze guieel quiayoolnie zho me len xyadoo ro me. Me nac meñ ne quianap zho grëse zho; ¹⁶led yedraa niina guet gbin zho, guet nisgaa zho; led yedraa niina ctsuu ngbidz zho, sonëëggaa zho. ¹⁷Meñ ne nac Carner yeen ne zo delant lo xcan ro qui, me gdeed ncuaañe gow zho, ni zigne rienie baxtor xpëcwxiiil zho ro guuu, sca zienie me zho zaatne quiada nis ne rdeed guielmban. Led yedraa niina goon zho.

8 Laa zeene laa meñ ne nac Carner yeen co pchug stib cint ne nzhidoo guits co, cint ne naca gadz ga, dzese biac gbaa; xtselaa sca biac dze gbaa.

²Blozh ga, gon naa zeene pcaania gadz anjl ne rzo lo Dios, tibga trompet. ³Ni brieequia stib anjl nzhen tib ptsigui niaa niapse guiiìb or. Zigne bdziñ me, bzo me delant lo xcan ro co, zaatne zo mezh or ne nac lo pcoog; ga pcaania me nroob yaal parne ctsieel mew grë diidz ne rnee grë miech ne no xnëz Dios zeene rzodiidznie zho Dios.

⁴Dzigo bzëëg anjl co yaal co, tipse goc gox co grëw xtiidz grë zha ne no xnëz Dios, laaw bdziñ lo Dios. ⁵Blozh ga, ptop me grë gui ne ndziib lo pcoog co bloo mew len ptsigui ne nzhen me ga, blaal mew lo guidzliu; dzigo psilo masaque rnee nguzi, rio bi, riab belye ne, ni bni tib zhodox.

Pcuedz gadz anjl trompet

⁶Horco laa gza gadz anjl ne pcaania gza gadz trompet co, laa zho nsinle nzhe_{na}, parne ycuedz zhow.

⁷Zeene laa tib anjl co pcuedz zhitrompet zho, hor co psilo bliaa_l guieque lo guidzliu ni bliaa_l gui lëë notsa ren. Gzoob ne tel_{ne} glë guidzliu tson_l lal, dzigo masaque tib lala bnitlo, bnitlo grëse yag, grëse lo guizh nguia ne no low.

⁸Blozh ga, zeene laa stib anjl co pcuedz xquiib, hor co biab tib ncuaan_u co nisdoo, masaque rluw zig rlu tib gui nroob ne quiayazbel. Gzoob ne tel_l glë nisdoo tson_l lal, bnitlo tib lala, bialow niapse ren zeene laa ncuaan_u co biab low. ⁹Bnitlo grëse ma, grëse guizh ne no lo tib lalga nis co, haxta grë barcw ne no low bnitlo.

¹⁰Loxaque blozh goc mi_n co, laa stib anjl co pcuedzaque xquiib zho, hor co laa tib mel nroob bringaa gbaa, masaque rso ma bel zig razbel tib lë guier, biab ma lo guidzliu. Lo grë guiebee, lo grë zhlian ne no lo guidzliu, lo tson_l lal ne gzoob ne naca, pxin_u ma tib lala. ¹¹Grëse nis co goc nlayag, ndal miech ne gut low. Nacne bleelë zho mel co Nlayag.

¹²Zeene laa stib anjl co pcuedz xquiib goc zho tap, hor co zigtaa lo ngbidza, zigtagaa lo mëëw, biuu tib niaza, schop niazaquew biaan_u rziini; grë mel ne ndziib gbaa, gzoob ne lo tson_l lal ne nac ma, hor co biuu tib lal ma. Rlupaa lega net net rquiaa ngbidz; zaatne nacgaa guieel, ni palal peet rlud.

¹³Laa naa nowi, tibaque zeene gon_u naa laa tib anjl bded groltaa zhan gbaa, haxta rlupaa rio bi zie me lo me, nguiedz zëëb tsi me rnee me:

—jProbsaxe grë miech ne ndxie lo guidzliu! Sac ncuaane ntseebraa gac, zeene laa ston_u anjl qui ycuedz xquiib me.

9 ¹⁻²Zeene laa anjl ne nac zho gaay ga pcuedz xquiib, hor co gon_u naa laa anjl ne briece gbaa padzeela ga pcaania tib liow, pxal zho ro tib guierdoo ro. Zeene laa ro guieer co bzhial, per nli goxdoo ne briece ga, tib psioogsew zhan gbaa, per ni palal rludraa lo ngbidz. ³Lo gox co, ga briece tiblo metso bliaa_l, bioogse ma gdipse lo guidzliu, grëse ma zob xcots ma, zig zob xcots meegu.

⁴Nacle diidz, peet gund_u ma grë guizh nguia, grë yag ne zëëb lo guidzliu, sinque laa ma tsie tsiesacsi ma grëse miech ne quiad xbey Dios quia. ⁵Yoob dox ne yquia zaatne yquiaaxcots ma, zigne rquia yoob zaatne rquiaaxcots meegu; per gute ma zho, loxaque sca csacsi ma zho dipse len_u gaay mëë. ⁶Len_u dze co, haxta zhal miech yguib zho dien_u zha guet zho, per grielod guet zho; soobladznë zho, tebaa zha gdzi_n guie_lgut lo zho, per le_l sozita.

⁷Masaque rac grë metso co zig rac grë guay ne tsienie zho lo di_l. Rac lo ma zig rac lo miech, ni zob tib ncuaan_u co guic ma, rluw zig rlu tib coron or; ⁸zëëb guitsguic ma zig zëëb guitsguic men_u wnaa, ni zëëb lay ma zig zëëb lay grë meedz. ⁹Dipse lad ma ntse tib ncuaan_u co, rluw zig rlu guiib; rio bi rzedz lo xi_l ma, pale bi ne rio zeene rded tib dzoob carret ne rgob guay, zie lo di_l.

¹⁰Lëédaa meegu, sca zob xcots grë metso co lo xcol ma, mine yquiaxcots ma miech dipse len gaay mée co. ¹¹Lëé grë metso co pxeel anjl dox ne rnabey guierdoo co, anjl ne rnee zha Israel Abadón, laa xtiidz zha Gres rnee zho ma Apolión. (Nac diidz co, zig rnee ne xtiitsë ne: Zha ne rnitlo.)

¹²Lëé tib guielnë ne gan miech ga, per bii ziaad schopa.

¹³Gon naa zeene laa anjl ne nac zho xoop ga pcuedz xquiib, hor co bin naa zëéb tsi tib men co lo mezh or ne nac lo pcoog ne zo lo Dios ga. ¹⁴Zëéb tsi men co rnee me lo anjl ne blozh pcuedz xquiib ga:

—Güey, güeyxadz gza tap anjl dox ne quiadoo ro guiubee nroob ne nac guiubee Eufates.

¹⁵Ible bzole gza tap anjl dox co par gun ma guielqui zeene laa dze co, laa hor co gdzin; dzigo nac ne hor co laa ma blaa, parne tsiegut ma miech. Gzoob ne telne gac miech ne ndxie lo guidzliu tson tant, masaque tib tant zho gnitlo ma. ¹⁶Bin naa chop gayoo millon zhaguiib ne gacnie ma, niapse guay sob grë zhaguiib co; masaque ma gnabey lo zho.

¹⁷Gonpaa naa zha rlu grë zhaguiib co zob zho lad grë guay co. Grëse zho quiantse tib lë guiiib gdipse zdoo zho; masaque tson color rbeew, rbeew color nizhnie, color nguia gbaa, ni color guts. Laa grë guay co, niaa guic ma zig niaa guic meedz, masaque rriee bel, rriee gox, rriee zufr ro ma; ¹⁸lo gza ncuane ne sca rriee ro ma, min co beet lalga miech co.

¹⁹Lala rap grë guay co xquielntseeb ma ga nëz ro ma, ni rapaque maw nëz lo xcol ma; masaque nac xcol ma zig nac grë meel dox, rias xcol ma rquiaa maw lad miech.

²⁰Niicle scataa nzian miech ne gut, zha ne biaan ib bdziebd zho. Tibaque laa zho no ziegän zho mendox, ziegän zho grë zhimdio zho, mdio ne niaa guiiib or, mdio ne niaa guiiib plat, mdio ne niaa guiiib brons, mdio ne niaa quie, mdio ne niaagaa yag; ncuane randa, ncuane ronda, ncuane rzëda, per laa zho no tibaque ziegän zhow. ²¹Laa zho no quiayut zho samiech zho, quianab zho pe sac samiech zho, quiangob zho zha ne led tsieeld zho, tibaque quiaban zho, jni palal zienied guic zho csaan zho grë guielntseeb co gbig zho lo Dios!

Anjl ne nzhen tib libr win

10 Blozh ga, gon naa biet tib anjl gbaa, rlupaa tib anjl nona, masaque no me tib lo xcow, ni quia tib gitye glaa guic me. Biinidoo ne rriee lo me, lëédaa lo ngbidz; sascaque ni me, masaque riaazbela. ²Nzhen me tib libr win, nzhialse lo libr co.

Bdzin me lo guidzliu, bzo me ni derech me lo nisdoo, laa min revés bzo me lo guidzliu. ³Ga zo me pquiaa me tib redz nroob, lëédaa zeene rgobeedz tib meedz; loxaque blozh pquiaa me redz co, zeene laa gadz nguzi bnee, pquiaa lo redz ne pquiaa me ga.

⁴Laa naa zale yquia naa mine bnee gza nguzi co, tibaque bin naa tsi tib men co gbaa, në me lo naa:

—¡Coo, yquiaad luu miñe bnee gza nguzi qui! Sac nodne gacnañ miecha.

⁵Dzigo gon naa blis anjl co nia derech me nêz gbaa, ⁶bzeet me Dios (men ne gdziñd dze guet, men ne bzaa gbaa, bzaa guidzliu, bzaa nisdoo, ni grêtaa ncuaañe no low), rêb me:

—Dios zobwi ganle, nasi gon laa dze co bdziñ. ⁷Grêse miñe bnee me lo zha ne biadteed xtiidz me, laaw gac niina zeene laa stib anjl qui ycuedz xquiiib zho. Grêse miñe no guic me gun me ni gocnañd miecha, niina laa zho gana.

⁸Dzigo wbiire bnee men ne zêeb tsi gbaa ga, nê me lo naa:

—Güey, bnaaz libr win ne nzhen anjl ne squi zo i.

⁹Nacne bia naa lo anjl co, rep naa lo me gneedz me libr win co, dzigo nêchaa me lo naa:

—Ledaaw nu, per lëëraasi none gow luuw. Zeene laa luu noyowa, nex sac luuw; per zeene gdziña zdoo luu, laaw gacnla.

¹⁰Dzigo bnaz naa libr win co nia me, dow naaw. Nligaa nex rdioowa now ro naa, per zeene laaw bdziñ zdoo naa, beennêw. ¹¹Blozh ga, nêchaa men ne bin naa tsi glo ga:

—Naraa gon none gnee luu ganle zha nac ncuaañe ted grêraa miech, zigtaa zha ne no guiedz wina, zha ne no guiedz nrooba, zha ne rnabeygaaw.

11 Dzigo biaad tib men co bneedz me tib yag ne rbix lo naa, rgaaw zig tib metr, bnabey me naa ctix naa xyadoo Dios, ctix naa zaatne nac lo pcoog, ni glab naa dien palal miech ne rie yadoo co riegāñ zho Dios. Pso me diidz lo naa, nê me:

²—Lëëraasi ctiixd luu nêz ley, sac laa lugar co nole lадznia zha zit; zha gnabeya, zha gnabey guiedz ndzon ne nacchen Dios i; dipse len tson iz groļ ne ziaad nu, gun zhow zigne gacladztaa zho. ³Gane len dze riique laa naa cxel chop zha ne runbepaa cho nac naa, tib lar beelze gacw zho, zig racwxab zha ne no guielñe; dipse len tson iz groļ co gnee zho ganle pe nac grê ncuaañe ziaadyob gan miech.

⁴Lëë zha co nac grop zhan yag oliv ni grop biini ne raquietle lo Xtiidz Dios ga zo lo Dios (men ne nac bizhuan guidzliu). ⁵Zeene laa grop zha co bdziñ, choot brielod lega nsacsi zho, sac grêse zha ne wbig gocntseeb lo zho, tib bieese zha co lo bel ne brieer zho. ⁶Bdeed Dios poder lo zho ycuëez zho nisguie, zrieelo gnabey zho guiabda dipse len dze ne nonee zho lo miech ga, haxta zrieelo gnabey zho tsaalo nis gaca ren; ni horne gacladztaa zho, zrieelo ndalraa grê guielzi ne gnabey zho gan miech.

⁷Zeene bzase dze ne bnee zho lo miech ga, hor co laa tib madzabdoobrieer len guierdoo co; ntseeb rac ma lo zho. Mbe blêbd zho lo ma, beet ma zho. ⁸⁻⁹Tson ngbidz groļ goot xcuerp zho groļ len guiedz ro co, guiedz ntseeb co. Pale Sodom, pale Egipt, sac gon guiedz coque, ga pquiaa miech men ne rnabey zho lo cruz. Ib bdeete miech diidz ngeets zho, grêse miech ne no dib lo guidzliu gon sca nix zho ga; ¹⁰dipse lo guidzliu, masaque tib guielbleydoo ne bio miech gza dze co, gon zho laa grop zha co gut, sac nroob benneed zho miech. Lo guielbley co, haxta bioxco miech pe ncuaañe bgadlsa zho lo samiech zho.

¹¹ Zeene blozh tson ngbidz grol co, tibaque zeene laa zhiEspiritu Dios bdeed guielmban lo grop zha co stib, laa zho guche ga; grëse miech ne ndxie lo guidzliu, zeene gon zhow, per nli bdzieb zho, rdzieldraa zho zha gun zho.
¹² Hor co nguiedz zëeb tib tsi men co gbaa, bredz me grop zha co. Gonlo grë miech ne rlëe ran zho ga, masaque no zho tib lo xcow, laa zho bzoquia gbaa;
¹³ loxaque laa zho bzoquia gbaa, zeene laa tib zho dox bni.

Gzoob ne telne nlë guiedz ro co tsii tant, tib tanta bnitlo lo zho co; gut gadz mil miech. Grëraa zha ne biaan, mazdraa bdzieb zho, lo dzeb co laa zho psilo roolnie zho Dios.

¹⁴ Sca gan miech stib guielnë co. Lëe bropa ga, per znusaque guiaad stiba.
¹⁵ Sac loxaque blozh ga, zeene gon naa laa stib anjl ne nac zho gadz ga, pcuedzlaque xquib; hor co nzian tsi men co zëeb gbaa, nguiedz rnee me:

Nasi nagon,

laa Dios gnabey grëse guiedz ne ndxie lo guidzliu, grop me Men ne pxeel me ga.

Mele gnabeya, grëtaa len izdoo ne ziaad.

¹⁶ Psiloque gza galptap mengol ne zob lo xcan ne zo lo Dios ga, pquitsgzhib zho lo me, haxta bzooblo zho lo liu, rdeed zho xquizh lo me, ¹⁷ rnee zho:

Xquizh xquielnzaac luu,

sac nasi laa luu glu men nroob nac luu, laa luu csilo gnabey.

Luutaque nac men ne mazdraa nroob.

¹⁸ Grëse guiedz, brieequia zha ne gocntseeb lo luu;

per nasi laa dze bdzin, laa luu glugaa xquielblëe luu lo zho.

Grëse zha ne gutle,

niina laa luu gdeed mine rieguaal zho tib tib zho.

Grë zha ne been xtsiin luu, pteed zho xtiidz luu lo miech,

grë zha ne ngab lo luu, zha ne runnon lë luu,

zigtaa zha gola, zigtagaa zha wina, niina laa luu gdeed zhipremio zho;

zha ne na loxaquegaa guielntseeb been,

niinataa laa luu gnitlo zho.

¹⁹ Loxaque blozh sca bnee gza mengol co, zeene laa yadoo ne no Dios gbaa bzhial, nieenpaa guin ne notsow quie lag ne pquia diidz ne psan me lo miech. Horco psilo bliaal tib guiequiedox, loxaque nëzrii nëzrec riab belye, ni rio bi ratsie nguzi; guiequiedox co noliala, zeene laa tib zhodox bnique.

12 Hor co gon naa blu tib ncuane gzee zdoo ne zhan gbaa. Ga brieequia tib wnaa, masaque igose me riab tib biini, zig riab xbiini ngbidz, ni zob tib coron guic me, quia tsiipchop mel cho coron co; ngali ni me zob mëe.
² Rlupaa zoney me mëed, rquiaadan me redz, laa me rquiale yoob ne gap me xpëed me.

³ Tibaque brieequia tib ma ngol, dipse ma rna nizhnie, niaa ma zigne niaa ngutsiets; zob gadz guic ma, ni tsii zhoz ma, tibga coron zob tib tib guic ma.

⁴ Znuse bzieecw ma xcol ma, blaal ma palal mel gbaa lo guidzliu; gzoob ne

nlë mel tson tant, masaque tib tant mel co blaal ma. Wbig ma lo wnaa co, quiambëz ma gal xpëed me, parne gow ma win.

⁵Per zigne gol mëed co, znuse bdziñ win nëz lo Dios, zaatne zob me rnabey me; tib mëëdbguiw, nacle diidz tib men ndip xtiidz gac win, win gac men ne gnabey grëse guiedz ne ndxie lo guidzliu. ⁶Hor cogazhaquew bzhoon wnaa co ga, laa me zie tib dan zit, zaatne psanle Dios diidz gan zho me dipse len tson iz grol.

⁷Nacne bio tib dil gbaa. Psilo anjl Miguel, grë me grëraa anjl ne nacie me, bdilnie me ma ngol co grë ma xanjl dox ma; ⁸per blëbd ma, bencxoon zho ma gbaa. ⁹Lëë ma ngol co ga nac meeļ dox ne notaque padzeela, lëë mendox ga, lëë Satanás ga, ma ne scataa tibaque noquidie miech; hor co laa zho bzonëz ma nëz lo guidzliu, grë xanjl dox ma.

¹⁰Dzigo bin naa, nguiedz zëëb tib tsi men co gbaa, rnee me:

¡Lëëw nagon!

¡Nasi laa dze ne ycaaniapaa Dios zha ne ngab lo me, laa dze co bdziñ!

Nasi laa me blu poder ne rap me,

nasi laa Men ne pxeel me lo guidzliu ga gnabey lo grëse zha ne ngab lo me.

¡Laa me bencxoonle mendox!

Ma ne scataa dze guieel nolisqui dien pe run zho,

nac zho zha ne nacgrë ne.

¹¹Peet brielod ma niun ma zho,

sac niapse men ne nac Carner yeen ne gut lo cruz ga bnalo zho;

ni lalnu ib bdziebd zho, bnee zho lo miech cho nac me,

bleeladz zho xquielmban zho, no zho haxta beet miech zho.

¹²¡Gacxe waa tib guielbley nroob ne rac gbaa niina!

¡Grëse to ne nac to zha ne no gbaa, golley!

¡Per probsaxe grë zha ne no lo guidzliu, sac laa mendox co tsiesacsi zho!

Ntseeb rac ma laa ma zie nëz co,

rien ma riaandraa nroob dze ne sonlaa ma.

¹³Zeene gon ma sca bzonëz zho ma lo guidzliu, dzigo ptsidil ma wnaa ne gop mëëdbgui co. ¹⁴Nacne bzoob zho chop xiil me, lëëdaa xiil msidoo; par grieelo xoon me lo ma, guey me dan zit ne nole diidz gan zho me dipse len tson iz grol co. ¹⁵Gocladz ma nsiloow ma me, blee ma tib nis naal ro ma, pale tib guiubee ro, ¹⁶per psaand guidzliu me, znuse bzhial low psi grëse nis naal co.

¹⁷Hor co mazdraa blëënie ma me, psilo ma noguib ma zha csacsi ma grëraa zha ne ziaad lo xtii me. Lëë grë zha co ziana mine rnabey Dios, ni rdziebd zho rlu zho xnëz Jesús no zho. ¹⁸Nacne güey ma, bzo ma ro nisdoo.

Brieequia chop ma ntseeb

13 Tibaque zeene gon naa laa tib ma nroob brieequia lo nisdoo co, ntseeb niaa ma. Ncuane gdzieb ne rlu ma, gadzraa guic ma zob ni zob tsii

zhos ma; tibga coron zob tib tib zhos ma. Gzase guic ma quia diidznë ne rneenë ma Dios. ²Rna ma zig rna grë meedz rabon, per ni ma niaa zig niaa ni os, laa ro ma niaa zig niaa ro meedz. Dzigo bzo ma nizhnie co ma guiaan ma xlugar ma co, male gnabey.

³No tib guic ma no tib mdel nroob, rlu mer niet ma zeene sca goc guic co ma. Min co gon miech, grëse zho psilo zho rleynie zho ma, mine rnabeytaa ma zho, run zhow. ⁴Hor co grëse zho rleynie zho ma nizhnie co, rquitsgzhib zho lo ma, rdeed zho xquizh lo ma bzo ma ma ntseeb co; scasaque rquitsgzhib zho lo ma ntseeb co, rnee zho:

—T̄sodraa stib zha zig luu! ¿Cho dien grielo t̄lnie luu?

⁵Dzigo rëb ma nizhnie co lo ma gnee ma grë diidz dox, grë diidznë, gneenë ma Dios; bdeed ma co diidz gnabey ma lo guidzliu dipse len tson iz gro. ⁶Nacne psilo ma rneenë ma Dios, rdzibdee ma me, rdzibdee ma grë zha no gbaa ne.

⁷Grë zha ne no lo guidzliu, zha ne ngab xnëz Dios, bdeed me diidz psacsi ma zho, haxta beet ma zho; masaque ma bnabey grëse miech ne ndxie lo guidzliu. ⁸Laa grëraa miech, güey zho güeygan zho ma, lëë grë zha co quiad lë lo xlibr men ne nac Carner yeen ne gut ga. Haxta zeene biala guidzliu no libr co, lo co quia lë grëse zha ne yгаа guielmban ne gdzind dze lozh.

⁹Lo grë to ne nac to zha ne rnalo Dios, zha ne no liaadz mine none naa nu, golquiaadiag mine gne naa nu ganle: ¹⁰Zha ne gnaaz to co zho to ladzguiib, yeque zho zio zho ladzguiib; zha ne csacsigaa to, tel zha gut zho to, scaque gut miech zho. Gacmbande to sca, sac gon ga glu to nli rnalo to Dios, nli zlëb to tel pe nactaa guielnë ne gan to.

¹¹Blozh ga, gon naa brieequia stib ma nroob lo guidzliu, scaque ntseeb niaa ma, zob chop zhos ma zig zob zhos carner, per ncuaane gdzieb ne zeene laa ma roptsie. ¹²Ye ma rap ma poder, squi zo ma ne no mdel nroob co guic rnabey ma tel zha racladz ma; bnabey ma yquitsgzhib grëse miech lo ma co. ¹³Ncuaane gzee zdoo miech run ma, haxta brieelo bnabey ma biet gui gbaa bliaala lo guidzliu. ¹⁴Ne scataa grë ncuaan ro ne rrieelo ma run ma, pquidie ma miech, bnabey ma zho bzaa zho tib mdio zig niaada ma ne bdedlaa lo guielgut ga, ma ne scataa nat guic ga bga.

¹⁵Blozh ga, bdeed ma xquielmban mdio co, parne grielo gneew. Bnabey ma guet grëse zha ne soliaadz yquitsgzhib low, ¹⁶ni bnabey ma grëse miech güey zho tib bey, yase yquiaw nia derech zho, yquiaagaaw quia zho; grëse zho zigtaa zha gola, zigtagaa zha lasa, zigtaa zha ne rapchena, zigtagaa zha ne peet rapda, zigtaa zha ne run xtsiin bena, zigtagaa zha ne choot rnabeyda.

¹⁷Zha ne tsod bey co, grielod gun zho wzi niicle grielodгаа cto zho; sac bey co rlu cho nac zha ne ngab lo ma, lëë lë ma ga, lëë número co rlu zha lë ma. ¹⁸Tib lë miech nac número co; xoop gayoo tsongal xoop naca. Zha ne ligier, zha ne niini, zien zho cho nac ma co.

Biil tib gayoo chooptap mil zho

14 Tibaque zeene gon naa laa men ne nac Xcarner yeen Dios ga zo guic Gui Sion, miech guizhiu ne zonie me ga; lee gre zha co nac tib gayoo chooptap mil zha ne quia le me guic ga, grop me Pxoze me. ²Hor co bin naa tib bi nroob gbaa, zig rio bi rrieengaa tib nis naal tib ro quie, zig ratsiegaa gre nguzi dox, ni bin naa ndal tsi zha co zeeb noyool zho tib cant, rlu niapse arp noyoolnie zho cant co.

³Tib cant cuba, laa zho noyoola lo men ne zob lo xcan ro co, zaatne zo gza tap bult mban co, zaatne zob gre mengol co. Loxaque tib gayoo chooptap mil zha ne pcuee lad gre miech guidzliu ga, zha cose brieelo pquiab lo cant co. ⁴Sac zha co ib beenctald xtol, rrieequia nac zho zig tib wnaa ne bgaald mgui; tibaque zo zho lo Men ne nac Carner yeen co, zaatne zieetaa me. Masaque nac zho lo Dios, ni lo men ne nac Carner co, zig tib nex ne glopaa riet riogon lo me. ⁵Biod dze ne nquidie zho, mbe zdo zho, mbe lo zho nez lo me.

⁶Hor co brieequia tib anjl nosiibe zhan gbaa, ney me Diidz Ndzon ne rdeed guielmban, diidz ne gdzind dze nitlo ga; laa me ziaad par gnee mew lo grese miech ne ndxie dipse lo guidzliu. ⁷Nguedz zeeb tsi me, rnee me:

—iGolguien golgon mine rnabey Dios, ine golleynie me, sac gon laa dze ne gun me guielwxtis bdzine! Ine golquitsgzhib lo me, golgan ganle me bzaa gbaa, me bzaa guidzliu, me bzaa nisdoo, me psan grese zaatne rlan nis.

⁸Zhits anjl co nal stib anjl, nguedz rnee me:

—iNasi laa guiedz Babiloin nitlo! iGuiedz nroob ne scataa pquiil greeraa guiedz, been gre menguedz co ncuuan ndzab ne beena, pxina guic zho!

⁹Zhiits co nalaque stib anjl, scaque nguedz zeeb tsi me, rnee me:

—iGrese zha ne yquitsgzhib lo ma ntseeb ne brieequia lo nisdoo ga, yquitsgzhib zho lo mdio ne niaa zig niaa ma ga, gdeedgaa zho diidz yquia xbey ma nia zho, yquiaagaaw quia zho, ¹⁰ib tedsod ye zho yгаа lo greetaa guielne dox ne csiaab Dios! Squi zobwi gre xanj me, squi zobwi Men ne nac Xcarner yeen me, laa zho guey lo gui dox ne rieguial zho, zaatne tibaque quiazabel tiblo ncuane rtsuu le zufr.

¹¹Dze guieel cso laan ne tsec gui dox co, ni palal gapd zho descans ga; sac sca pquitsgzhib zho lo ma ntseeb co, pquitsgzhib zho lo mdio ne niaa zig niaa ma ga, ni pquia zho xbey ma. ¹²iGa naganle gan gre zha ne ngab lo Dios, zha ne mban zigne rnabey me, zha ne tiblque zienal zhiwseed Jesus, zeena gacmband zho niicle tel pe nactaa gre guielne ne noyan zho!

¹³Dzigo bin naa zeeb tib tsi men co gbaa, ne me:

—Pquiaa mine gni naa nu.

Nechaa me:

—Dichos grese zha ne rnalo Jesus, niicle niinaga guet zho.

Pquiabaque Espiritu Sant, rnee me:

—Nligaa dichos zho, sac grē guiełnē ne bded zho, nataa laaw blozh; nasi laa zho ygaa guiełnzaac nroob ne gdeed Dios lo zho, porne wban zho zigne rnabey me.

¹⁴Zeene bui naa stib, dzigo laa naa gonle tib xcow nquits; lo xcow co zob tib men co, rlu me zig rlu Men ne pxeel Dios ga biaad lo guidzliu. Zob tib coron or guic me, ni nzhen me tib yaguiits nroob.

¹⁵Dzigo brieē tib anjl len yadoo ro ne zob gbaa, nguiedz bnee me rēb me lo men ne zob lo xcow co:

—;Niinaga blooyaguiits grē zhob ne squitaa zēēb lo guidzliu! ;Sac gon gollew, laa dze ne tsasa bdzinle!

¹⁶Dzigo pteed men co yaguiits dipse lo guidzliu, ptop me grēse zhob co.

¹⁷Blozh ga, brieē stib anjl len yadoo ro co nzhen me tib guuib hoz, rlpuaa per nli ndox low.

¹⁸Loxaque brieē anjl co, laa anjl ne quianap gui ne ndziib lo pcoog brieēque; nguiedz bnee me rēb me lo anjl ne nzhen hoz ga:

—;Niinaga pchug grēse mzhiig uv ne squitaa zēēb lo guidzliu, sac gon laaw gule!

¹⁹⁻²⁰Hor co znuse pteed anjl co hoz lo guidzliu, pchug me grēse mzhiig uv co, güeycodzēē mew tib len pil nroob ne zob tib lad ro guiedz. Ga güeyzēēni zho grē uv co, ptaadz zhow; dzigo ren naaldox ne brieē zhan pil co, masaque lal ne rzēni miech xoop ngbidz, lal ga wbiig lo ren co igo pil co; tel niaca mine sēēb tib guay low, zdziņa haxta zhan cho ro ma. Rrieēquia sca nagon gac mine gnabey Dios ted grē zha ntseeb.

15 Tibaque zeene gon naa, ncuaane ro, ncuaane gzee zdoo ne goc gbaa. Brieēquia gadz anjl, tib tib anjl co tibga guiełnē guiaadnie me ted grē miech ne ndxie lo guidzliu; guiełnē co lozh cueezhian Dios miech.

²Dzigo gax lo naa gon naa tib dzoon miech, masaque rquiabni, masaque rna gui zaatne zo zho, nēzrii nēzrec rac lo co, pale lo nisdoo. Lēē grē zha co been gan, pquiitsgzhibd zho lo ma ntseeb co, pquiitsgzhibd zho lo zhimdio ma, niicle biodgaa zho xbey ma. Grēse zho tibga xarp Dios nzhen zho, ³quaiyool zho zig biil grē zha ne psilaa Moisés Egipt. Rley zho, sac niina laa Xcarner yeen Dios psilaa zho lo ma ntseeb co; rnee zho:

Dios, luu ne nac luu men ne grēsew rrieelo run,

ncuaane nroob, ncuaane gzee zdoo miech, nac grē ncuaane run luu.

Luu nac men ne rnabey,

lo grēse zha ne ngab lo luu, niapse diidzli rnee luu, niapse mine

nonguiel rnabey luu.

⁴ ;Zha rna zha ne dien gdzieebd luu?

;Zha rna zha ne gleyd goolnie luu?

Sac luuse nac men mbe zdoo, men ne ni tib dol rapd.

Grēse guiedz ne ndxie lo guidzliu,

zrieē miech guiaad zho yquiitsgzhib zho lo luu;

sac nasi laa luu blu zha run luu guielwxtis.

Gadz anjl ne pxeel guielnë lo guidzliu

⁵Hor co gon naa bzhial zaatne nac Lugar Nda len xyadoo Dios gbaa, ⁶ga briece gza gadz anjl ne guiaadnie guielnë ne no guiaad lo guidzliu ga. Ine nquitsbie rna xab gza anjl co, haxta rzëëg lada, ndxiega tib cinch or haxta ncaan len zhicw me.

⁷Dzigo wbig tib bult mban co, bdeeda tibga cop nroob niaa niapse guiib or lo tib tib anjl co; len cop co ga nodzë grëse guielnë ne nac xquielblëë Dios, men ne gdzind dze guet. ⁸Hor co grëse xquielndzon Dios, grëse poder ne rap me, biodzë len yadoo co, rluw zig rlu tib gox; choot brieelodraa nzëëb len yadoo co, haxta blozh gon miech gza gadz guielnë ne güeynie gza anjl co.

16 Dzigo bin naa nguiedz zëëb tib tsi men co len yadoo ro co, bnee me lo gza gadz anjl co, rëb me:

—Goltsie, goltsiexiee gza guielnë ne nac xian Dios i lo guidzliu.

²Dzigo briece tib anjl co, güey me, güeylaat me xcop me lo guidzliu, hor co grëse zha ne noquiitsgzhib lo zhimdio ma ntseeb co, zha ne quia xbey ma ga, psilo biala dipse lad zo, yoob dox ne rquia zho.

³Güeyaque stib anjl co, bdzin me blaate me xcop me lo nisdoo, zeene laa ncaaan co bzhiee lo nisdoo, grëse nis co bialo ren ctoog; ni stib ma ne no low biaandraa.

⁴Laa min co bded, zeene laa stib anjl ne rac zho bion ga güey, güeylaat me xcop me grëse guiubee, grëse zaatne rda nis; nacne grëse nis co bialo ren.

⁵Dzigo bin naa tsi anjl ne rnabey nis, rëb me lo Dios:

—Dios, ible rieguial mine been luu i; luu ne nac luu men mbe ne ni tib dol rapd, men ne tibaque nac, men ne gdzind dze gdzëë. Lëëw i been luu, squi beenquizh luu grë miech qui mine zëëb zho, ⁶sac gon blactaa grë zha ne ngab lo luu, blactaa grë zha ne biadteed xtiidz luu psacsi zho, pxiee zho xchen grë zha co. Min qui rquiin zho, guie zho grë ren qui na.

⁷Zëëbaque tsi stib men co zaatne nac lo pcoog len yadoo co, rnee me:

—iDios, luu ne nac luu men ne nroob ne grësew rrieelo run, nligaa ible rieguiala squi beenquizh luu grë zha qui mine been zho!

⁸Blozh ga, briece stib anjl ne rac zho tap ga, güey me güeylaat me xcop me lo ngbidz, hor co gocnlëëraa xbiini ngbidz, ptsuuw miech. ⁹Niicle scale nodzu grë miech co, per ib biablod zho, laa ne nsaan zho xquielntseeb zho, nleynie zho Dios, lel psilo zho rneenë zho me, pe nacne noxeel me grë guielnë co.

¹⁰Zeene briece stib anjl co, güey me güeylaat me xcop me zaatne zobnabey ma ntseeb ne briequia lo nisdoo ga, dzigo znuse goc tib ncowdoo grëse guiedz ne rnabey ma. Lo yoob dox ne rquia grë miech co, haxta rowye zho ludz zho; ¹¹per niicle scaw, ib psaannd zho xquielntseeb zho, lel psilo zho rneenë zho Dios, pe nacne scataa rquia zho yoob, pe nacne scataa quiayaal gdib lad zho.

¹²Zeene laa anjl ne rac zho xoop ga güey, güeylaat me xcop me len guiubee Eufates, hor cogazh wbidz nis naal ne zhoob guiubee ro co. Nacne bio nëz ted grë men ne zobnabey grë guiedz ne ndxie nëz ne rlan ngbidz.

¹³Hor co gon̄ naa tson̄ me yozh, niaaw zig niaa mbiich, tiba brieer ro ma ngol nizhnie co, tiba brieer ro ma ntseeb ne brieerquia lo nisdoo ga, laa stiba brieer ro zha ne noteed xtiidz ma ntseeb co. ¹⁴Chen̄ mendox nac gza me co, runa grē ncuaañe nroob ne rzee zdoo miech; dzigo güeya güeyzodiidzniew grēse zha rnabey ne no dipse lo guidzliu, parne tipse gac zho tilnie zho men̄ ro ne nac Dios, gal̄ dze ro ne gdeed me min̄e rieguiäl̄ tib tib miech.

¹⁵Tibaque zeene laa men̄ ne rnabey ne ga bnee, nē me:

—Zhile gon̄ laa naa guial̄. Nsin sca golso, sac zigne racnand bizhuan yu pa hor seēb ngbaan yu, scaque gacnande to pa horpaa guial̄ naa. Dichos zha ne yquiambēz naa, ine mbe xab zho nacw zhow; sac gon̄ mban tsie zho telne scase zo zho zeene laa naa glanso, ni lala tib guiel̄to dox ga grieequia zho.

¹⁶Dzigo pcaalsa grē zha rnabey co grē xmenguiib zho, zaatne rnee zha Israel Armagedón.

¹⁷Hor co güey anjl ne nac zho gadz ga güeylaat me xcop me lo me ne rriee lo guidzliu; dzigo bnee tib men̄ co zaatne nac lo zhixcan Dios len̄ yadoo gbaa ga, nguiedz zēēb tsi me rnee me:

—¡Nasi nagon̄ ledaaw blozh bza!

¹⁸Dzigo psilo nēzrii nēzrec riab belye, loxaque bi rio ratsie nguzi. Lo belye co, lo bi dox co, laa tib zho dox psiloque bni; waltaa ne ndxie miech lo guidzliu, gard gni tib zho dox zig min̄ co. ¹⁹Grē guiedz ne ndxie lo guidzliu, per ni rludraa zha niaaw; zig nac guiedz nroob ne nac Babiloin ga, haxta tson̄ lē goca. Hor co beenquizh Dios zha Babiloin, grētaa guiel̄ntseeb ne zēēb zho; psiaabzi me zho por grētaa zhian ne pquiaa zho me.

²⁰Grēse guidzliu win ne no lo nisdoo, rludraa dien̄ yow; grē gui glaa, loxaque nēzrii nēzrec bliaała. ²¹Min̄ co blozh, zeene psilo bliaal̄ tib guiequie dox lad grē miech co, tib tib guiequie co nēw maase choo kil. Gon̄ zho scataa noyab guiequie co, laa zho noque rdzibdee zho Dios.

Zob tib wnaa yozh lad tib ma ntseeb

17 Lo gza gadz anjl ne sca blaar grē guiel̄nē co lo guidzliu, lad co brieer tib me biaad, nē me lo naa:

—Dē ganle, zeena glu naa lo luu zha nactaa caxtigw ne ygaa wnaa yozh ne ran̄ luu squi zob lo grēse nis ne no lo guidzliu. ²Lēē wnaa qui pxin̄ guic grēse miech ne no lo guidzliu güeynal̄ zho grētaa guiel̄yozh ne been̄ me; haxta grē zha rnabey, güeynal̄ min̄ co.

³Sca nolu Espíritu Sant grē ncuaañ co lo naa, dzigo güeynie anjl co naa tib dan zit. Ga gon̄ naa laa wnaa co zoble lad tib ma nroob, ntseeb niaa ma co, zob gadzraa guic ma ni zob tsi zhoz ma; gdipse ma rna nizhnie, gdipse lad ma quia grē diidz ntseeb ne rneenē ma Dios.

⁴Glaa glaa zhits ma ntseeb co zob wnaa co, masaque nizhnie nlaan, nizhnie ren rna xab me, loxaque grē guuib or, grē quie rbebni, grē quie perl, ngalguiee lad lar co. No tib cop nroob niaa me, niaaw niapse guuib or, rrieerquia leen̄ co nodzē grētaa guiel̄ntseeb, grētaa guiel̄yozh ne run̄ me. ⁵Ni quia bla lan diidz

quia me, rneew: “Lëë guiedz nroob ne nac Babiloin nu, guiedz ne nac xniaa grëse wnaa yozh, guiedz ne nac xniaa grëse zha ne ruñ ncuaañe mbixladz.” Lëë lë me ga, hor coraa bzhoobneñ zha nac lë me.

⁶Dze rwi naa lo me, dzigo goñ naa rac me zig rac zha ne rzudz. Nziandox zha ne no xnëz Jesús beet me, rrieequia grëtaa ren ne pxiee me ga sca noyüñ me. Bzee zdoo naa, ni bdzieeb naa goñ naa zha rac wnaa co. ⁷Dzigo nëchaa anjl co lo naa:

—¿Pe nacne rdzieeb luu? Na ganle gni naa lo luu cho nac wnaa co, cho nac ma ne sca zob me lad ga. ⁸Padzeela no ma ntseeb co, guiend ma niinapaa, per zhile laa ma griee leñ guierdoo ne nioogyu ma, laa ma griee ga parne diunavez nitlo ma; grë zha ne quiad lë lo libr ne zhobnee cho nac zha ne ygaa guielmban ga, seedox zdoo zho zeene gan zho laa ma grieequia stib, sac tibaque nan zho gutle ma.

⁹Wen wen pquiaadiaga ganle: gza gadz guic ma ga, rrieequia lëew nac gza gadz gui win ne zob wnaa co zobnabey me. ¹⁰Ni rrieequiaque lëë gadz zha ne rnabey ga: gaay zho bnabeyle, tib zho quianabey niina, laa stib zho naraa gnabey; per zeene laa zha co guiaad, zhis dze ne gnabey zho. ¹¹Lozhse gnabey zha co, laa ma gnabeyaque, ma gac zha rnabey co xon, niicle ne yelee ma ga goc zha co gadz; gataa laa ma nitlo.

¹²Zhoz ma, rrieequia lëë stsii zha ne gnabey ga, gzase zha co naraa gnabey zho, tipse ycaania zho guielrnabey gza zho ma. Zhisaque dze sca gnabey zho, ¹³dzigo laa gza tsii zha co guiaañ diidz gzo zho ma, ma gac zha nroob lo zho. ¹⁴Zacnie zho ma, grëse zho tsie tsietilnie zho Xcarner yeen Dios, per znuse gun men ne nac Carner yeen co gan lo zho; sac me nac men ne rnabey lo grëse zha ne rnabey, lo grëse zha ne non. Grëse zha ne tsienal zhits me, tsietilnie zho ma co, lëë grë zha co nac zha ne bzooBlo Dios bredz me zho bgab zho xnëz me, ni ib psaand zho me.

¹⁵Blozh ga, nëchaa anjl co lo naa:

—Lo grëtaa nis ne goñ luu sca zob wnaa yozh co, rrieequia lëë nis co nac grëse guiedz, grëse dii miech ne ndxie lo guidzliu. ¹⁶Per zdziñ dze lëëque ma ntseeb co, tilnie wnaa co, grë ma gza tsii zha ne rrieequia nac zhoz ma ga; zlëëniedox zho wnaa co, sanwin zho me, haxta xab me cuee zho, znitlo zho me, sëëg zho me lo gui.

¹⁷Ib Dios csiaab guic zho gnitlo zho wnaa co, ni meque csiaab guic zho gzo zho ma co gac ma zha ne gnabey lo zho; laa me gun min co, parne grieequia grëse mine bneele me no gac. ¹⁸Laa wnaa co, rrieequia me nac guiedz ro ne rnabey lo grëse guiedz ne ndxie lo guidzliu.

18 Blozh ga, goñ naa laa stib anjl ziad-zëëb gbaa, rlu tib anjl nona, dipse lo guidzliu biab biinidoo ne ziaadnie me, ²nguedz zëëb tsi me rnee me:

—¡Nasi laa guiedz nroob ne nac Babiloin ga nitlo! ¡Loxaque mendox yquianzë ga, loxaque grë ma guix, loxaque grë ma mbixladz cuew! ³Laaw nitlo, sac noquiila grëse miech ne ndxie lo guidzliu, grëse zha ne rnabey, quiaayun zho grëtaa guielyozh ne ruña. Lo grëtaa guielyozh co quiaayun

ricwa grēse zha ne ruṅ wto; quiaxin grē ncuaaṅ co zho, masaque quiayuna zho zig ruṅ nziu.

⁴Dzigo zëëb stib tsi meṅ co gbaa, rnee me:

—¡Grēse to ne nac to miech ne ngab xnëz naa, golgon diidz, golreee guiedz qui! Ib gunde to doṅ ne quiayuna; zeena ygaade to grëtaa guieṅñe ne ygaaw, ⁵sac nroobdox nac grē doṅ ne quiayuna, telne niaca ncuaaṅ cue monton, rreeequia haxta gbaale rdzin guic monton co; gane ib tedsod zunquizh Diosa grëtaa guieṅntseeb co.

⁶Gacxe na grēse miṅe beena miech, miṅcoque saca. Grēse tel zha psacsiw miech, chop lalga miṅe teda. ⁷Zigne squitaa now lo grëtaa ncuaaṅe racladza; scagaa na guieṅñe dox ne gana, haxta goona lo grëtaa guieṅñe co. Niats raca rneew: “Naa rnabey. Nacd naa cho zha ne zotib, zig rzac grē wnaa viud; naasi gdzind dze ne tso naa guieṅñe.”

⁸Nli squitaa niats raca, per zeene guiaba ladznia guieṅgut, ladznia gbin, ladznia grëraa guieṅñe ne gana, tib dzeque lozha. Ni lozh ga, haxta zeca lo gui; miṅ co gnabey Dios teda. ¡Me nac meṅ ro ne gunquizha grëtaa miṅe beena!

⁹Grē zha ne rnabey grē guiedz, zha ne scataa bley beṅ grē guieṅlyozh ne ruṅa; zeene gan zho goxdoo ne rso noyeca, mban gac zho, zoon zho zio zho xquieṅñew. ¹⁰Zdzieb zho gan zho grëtaa guieṅñe ne nodeda ga, lo dzeb co, ni lalnu gbigd zho. Lëë gdib so zho goptsie zho, guiab zho: “¡Probsaxe luu Babiloin, guiedz nroob, guiedz non nac luu! ¡Pa briece guieṅñe qui squi znuse nitlo luu!”

¹¹Grē zha ne ruṅ wto dipse lo guidzliu, ye zho zio zho xquieṅñew, mban gac zho guieṅdraa cho si lo zho. ¹²Sac masaque lëëw rzi:

guiib or,
 guiib plat,
 grē quie non,
 grē perl,
 grē lar niazh,
 grē lar sed,
 grē lar nizhnie nlaan,
 grē yag ne nex rlaa,
 grē ncuaaṅe niaa marfil,
 grē ncuaaṅe niaa grē yag wen,
 grē ncuaaṅe niaa guiib,
 grē ncuaaṅe niaa brons,
 grē ncuaaṅe niaa quie mármol,

¹³grē blad canel,
 grē guizh scuaan,
 grē yaal ne ndzon rlaa,
 grē guizh, grē nceit ne nex rlaa,
 grē nziu,
 grē nceit,
 grē zhobxtil,

grë rin niazh,
grë ma ne rey yo,
grë mëcwxiil,
grë carret,

haxta grë miech ne runzhoo dziin lo samiech.

¹⁴'Zrieequia zha ne guiab lo guiedz co: "¡Bdзинаque dze ne blozh luu, pa sëraa scataa yquianie luu grë ncuaañe rdziladz luu! ¡Grëtaa ncuaañ niazh, grëtaa ncuaañe rap luu, gdzindraa dze ne gbiire gan luuw!"

¹⁵'Grë zha ne run wto ga, zha ne scataa gocricw lo grë wto ne been zho guiedz co, zdieb zho, zit so zho gan zho grëtaa guiełnë ne nodeda. Zio zho xquiełnëw, haxta zoon zho ¹⁶⁻¹⁷guiab zho: "¡Probsaxe guiedz ro qui, squi znuse bnitlow! Biopaa dze gocnona, masaque goca zig tib wnaa ne racw grë lar niazh, grë lar nizhnie nlaan; wnaa ne rna grë guieb or, grë quie non, grë quie perl, rio yan, rio yan nia."

'Grë zha ne rnabey barcw, grë zha ne rsëew, zha ne no leña, ni grëragaa zha ne run dziin lo nisdoo, zit so zho gan zho tsec guiedz co; ¹⁸zeene gan zho goxdoo ne rso noyeca, ziab zho: "¿Zha rnaraa dze ne dzian ne stib guiedz nroob zig guiedz qui?" ¹⁹Mban gac zho, zio zho xquiełnëw, zoon zho, squiaadan zho redz, guiab zho: "¡Probsaxe guiedz ro qui squi znuse bnitlow! Lo grëtaa dimi ne pquianiew, blactaa beenricwa ne grë ne grëraa zha ne run dziin rii."

²⁰'Sca nagon nitlo guiedz co. Grëse to ne nac to zha ne no gbaa, grëse to ne nac to zha ne ngab lo naa, grëse to ne nac to zha ne pxel naa güeynee xtidz naa, zha ne güeyteed xtidz naa, zeene gan to laa guiedz co nonitlo, golley, sac gon ga gunquizh Dios miech ne no ga grëtaa mine been zho to.

²¹Zeene blozh bnee men co, dzigo gon naa tib anjl, rlu tib anjl macisa, znuse blis me tib quie nroob, niaaw zig niaa quie molin zhobxtil, dipse gan bron mew lo nisdoo; blozhse bron mew, nëchaa me:

—Squi nagon nitlo guiedz ro ne nac Babiloin ga, gdzindraa dze ne gbiire gan miecha. ²²Masaque nroobladzdoo ne raca niina, loxaque di noyac grë ro xnëza, zaatne noyool zho vihuel, zaatne noyool zho bzie, zaatne nocuedzгаа zho trompet, nëzrii nëzrec rac miech zie zho lo xtsiin zho, loxaque lo grë quie molin rzedz nozuu zho zhob; per gal dze co grësew lozh. ²³Squitaa biini ne rquiaw niina, squitaa tibaque quiayac quiełtsieela, per gal dze co ncowse gnaw, pa sëraa gac lniw.

Laaw nitlo, sac blactaa noyungüeta miech ne no grëraa guiedz ne ndxie lo guidzliu lo grë zhiwseed mendox; pe zhidaa noyunicwa grë zha ne run wto por grë wseed co; ²⁴pe zhidaa miech zëëba. Nzian zha ne ngab lo Dios, nzian zha ne riadteed xtiidz me, rnabeya ret zho.

19 Zeene blozh ga, bin naa zëëb ndal tsi men co nëz gbaa, rlu miech guizhiuw, nguiedz rnee zho:

¡Zha ndzontaa xDios ne! Me nac men ne rsilaa miech, parne ygaad zho lo caxtigw.

Me nac men ne rap poder,

- me nac meṇ ne rieguial̄ dziuunnon ne;
² sac gon̄ mesi run̄ me guiel̄wxtis zigne no gaca.
 Gacxe waa, sca gun̄quizh me guiedz qui grētaa guiel̄yozh ne noyuna,
 grētaa xchen zha ne ngab lo me, zha ne bnabeya gut;
 rriequia naca zig tib wnaa yozh,
 quiauyungüeta miech quiauyunctal̄ zho xtol̄ zho.
³ Blozh ga, biire bin naa tsi zho, rnee zho:
 ¡Zha ndzontaa Dios! ¡Min̄ qui nagon̄ rieguiala, gdzind̄ dze ne lozh csow gox!
⁴ Hor co laa gza galptap mengol̄ co, ni gza tap bult mban co pquiiitsgzh̄ib lo
 Dios lo xcan ne zob me ga, haxta bzooblo zho lo liu, beennon zho me, rnee
 zho: “¡Nliw! ¡Luuse nac meṇ ne ndzon!”
⁵ Zëëbaque stib tsi meṇ co zaatne nac lo xcan co, rnee me:
 ¡Grëse to ne nac to zha ne quiauyun̄ dziin lo me,
 zha ne rien̄ meṇ non nac me,
 zigtaa zha wina, zigtagaa zha nona, gol̄gool̄nie me!
⁶ Dzigo wbiire bin naa tsi grē miech guizhiu co nēz gbaa, rio bi zëëb tsi
 zho, pale zeene rio bi nisdoo, zeene riogaa bi rnee grē nguzi dox, rnee zho:
 ¡Gol̄gotsaa dziool̄nie ne me!
 ¡Me nac xDios ne, me nac meṇ nroob ne rnabey!
⁷ Gol̄gotsaa gley ne, gol̄gotsaa dziuunnon ne me,
 sac gon̄ laa dze bdzin̄ laa Carner yeen̄ ne nac Xpëed me ga ctsieelnia;
 grē zha ne ngab lo me,
 zha ne rriequia nac ndzooop ne ctsieelnia Carner yeen̄ co, laa zho
 nacwxable.
⁸ Masaque rlu zho zig tib ndzooop ne ctsieelnia,
 ine nquitsbie, ine rbebni lar niazh ne nacw zho;
 me bdeed diidz got zho lar co,
 ga rlu gan̄le mban zho zigne racladz me.
⁹ Dzigo rneechaa anjl̄ ne sca bron̄ quie co lo nis:
 —Wen zie grē zha ne bredz Dios tsie lo xquiel̄tsieel meṇ ne nac Carner yeen̄ co.
 Bnabey me naa pquia naa diidz co, blozhse ga, nēchaa me lo naa:
 —Xtiidz Dios ga gon̄, me rneew.
¹⁰ Hor co pquiiitsgzh̄ib naa lo anjl̄ co ni naa gun̄non naa me, per bzhiguield̄ me.
 —¡Coo! —nē me lo naa—. ¡Guso! Gocnan̄ gan̄le ye naa tib ngund̄ziinse nac
 naa lo Dios, nac naa zigne nacaque luu grē luu grēraa zha ne squi noxco zienal̄
 min̄e nac zhiwseed Jesús. Dios none gun̄non luu, sac gon̄ tib ngund̄ziinse nac
 naa bzet naa min̄ co, lëë gdib bne naa gan̄le zha nac xtiidz Jesús.
¹¹ Dzigo hor co gon̄ naa bzhial̄ zhan gbaa, ga brieequia tib meṇ co zob me
 lad tib guay nquits, zëëb diidz niapse diidzli rnee me, sac run̄ me guiel̄wxtis
 zigne no gaca, ni rdil̄nie me zha ne rieguial̄ til̄nie me. ¹² Masaque rbebel
 bziaalo me, nzian xcuaa coron zob guic me, ni quia stib lë me quia me,
 loxaque mese nan̄ dien̄ zha nac lë co me. ¹³ Rnadraa xab me di ren, lëë me
 ga rnee zho: Xtiidz Dios. ¹⁴ Ndal grē menguiib ne no gbaa nal̄ zhits me, ye

zho niapse guay nquits zob zho; niapse lar niazh nacw zho, ine nquitsbie rna grë lar co.

¹⁵Rlu choot grielod gacndaan lo me, masaque zob tib spad lots ro me, laa me nzobro spad co parne tilnie me grë guiedz ne gacntseeb lo me. Masaque me gnabey grëse guiedz, ndip gac xtiidz me, ni tib choot quuitsd mine gnabey me; zeene laa me gunquizh miech grë xquieIntseeb zho, cxeel me zhian ne csiaab Dios ygaa zho, zun me zho zigne run miech uv zeene rzëeni zhow. ¹⁶Lad lar ne nacw me ga, ni tib cho cor me, ga quia cho nac me, rneew: “LËË MEN RII NONRAA LO GRËSE ZHA NON, ME RNABEY LO GRËSE ZHA NE RNABEY.”

¹⁷Blozh ga gon naa zo tib anjl lo ngbidz, nguiedz zëeb tsi me rbedz me grëse maxiil ne row grë magut, rnee me:

—iLigier golcaalsa! iGoltë zeena yquiin to guielwagw ne gneedz Dios lo to niina! ¹⁸Goltë zeena gow to grë zha ne rnabey grë guiedz, grë zha ne rnabey lo menguiib, grë zhaguiib ne zëeb diidz nac zha valor; goltë gow to grë guay, gow to grë zha ne rzob lad ma. Goltë gow to grëse miech, zigtaa zha ne runcunzhoo miech dziina, zigtagaa zha ne choot rnabeyda, zigtaa grë zha ne nac zha nona, zigtagaa grë zha wina.

¹⁹Dzigo gon naa ma nroob ne brieequia lo nisdoo ga, ma ne scataa ntseeb rlu ga, psilo ma ptop ma grëse zha ne rnabey grë guiedz ne ndxie lo guidzliu. Pcaalsa zho grë xmenguiib zho, zha guizhiuw, laa zho brie zietilnie zho men ne zob lad guay nquits co grë xmenguiib me.

²⁰Lo dil co, ga bgaa ma nroob co, ni bgaa zha ne pteed xtiidz ma lo miech; zha ne scataa squi zo ma been zho grë milagr co pquidie zho miech, bio guic zho bio zho xbey ma, ni beennon zho mdio ne rlu zig rlu ma ga. Zigtaa maw, zigtaa zha ne pteed xtiidz ma ga, nguia mban zho laa zho biab tib lo gui dox zaatne noyec zufr. ²¹Laa grëraa zha ne scataa gocnie ma ga, grëse zho gut lo spad ne nzobro men ne zob lad guay nquits co, hor co bdzinbe grëse maxiil ne row magut, güeytow ma grëse ngutoo co haxta biel ma.

Bnabey Jesús tib mil iz

20 Blozh ga, tibaque zeene gon naa laa tib anjl biet bgaa, nzhen me tib liow, ni nzhen me tib caden. ²Dzigo bnaaz me ma ngol ne rna nizhnie ga, meel ne notaque padzeela ga, ma ne nac mendox ga, ma ne nac Satanás ga, bzoob me ma caden co; ³con liow ne nzhen me ga pxal me tib ro guierdoo, psëeb me ma len guierdoo co. Blozh ga dziits dziits psioog mew, zeena grielod gree ma tsiequidieraa ma miech.

Ga tsogyu ma dipse len tib mil iz, lozhse tib mil iz co ible laa ma no gree ga, sonlaa ma zniip.

⁴Hor co gon naa laa grë zha ne bzo Dios cobey pe nac xtol tib tib miech, laa zho bzob lo xcan ne rieguial sob zho. Gonaque naa zhiespíritu grë zha ne psacsi miech, bga zho yan zho, beet zho zho loxaque ne no zho xnëz Jesús ni bnee zho xtiidz me lo miech; gon naa grë zha ne bzhiguield nquitsgzhib lo ma ngol ne brieequia lo nisdoo ga, bzhiguield zho niunnon zho mdio ne

rlu zig rlu ma, niicle bzhiguield zho nio zho xbey ma. Goṅ naa brieegan zho grēse zho, par gbannie zho Jesús, gnabey me grē me zho dipse leṅ tib mil iz.

⁵Lëē grē zha co nac miech ne gloopaa grieegan, laa grēraa menṅut, zha co grieegan zeene laa tib mil iz co gza. ⁶Dichos grē zha ne glo grieegan ga; lo Diosle ngab zho ga, noxtseebdraa zho guey zho gabıl, masaque lo Dios, lo Jesús guṅ zho dziin, gac zho zig tib pxoz lo me; tipse gnabey me grē me zho leṅ tib mil iz co.

⁷Zeene blozh tib mil iz co, dzigo goṅ naa laa menṅox brieeg zaatne nioogyu ma ga, ⁸güey ma güeyquidie ma zha Gog, güeyquidie ma zha Magog, grēse guiedz ne ndxie lo guidzliu güeyquidie ma miech, tipse been ma zho grēse zho parne tiṅnie zho Dios. Miech guizhiuw, miech ne lëb ne glab new, guṅ ne cuent yuzh ne ndxie ro nisdoo, ⁹ntseeb rac zho, grēse zho laa zho bdziṅ zaatne ndxie guiedz ne rleyne Dios, zaatne no grē zha ne ngab lo me ga; per zeene laa zho ndxiele igo guiedz co parne gnitlo zhow, hor co bnabey Dios bliaal gui lad zho, bzëega zho grēse zho. ¹⁰Laa menṅox, bnabey me bgaa ma bey ma lo gui dox ne nac gabıl, zaatne nole ma ngol ne sca brieequia lo nisdoo, grop ma co zha ne pteed xtiidz ma ga. Lo gui doxa, niapse zufr noyec lugar co, ga tsu ma dze guieel, gdziṅdraa dze ne grieeg ma ga; caxtigw dox ne ted ma.

Beenquizh Dios miech miṅe been zho

¹¹Blozh ga, goṅ naa tib men co zob me tib lo xcan ro, dib nquitsbiese rna xcan co. Zigtaa guidzliu, zigtaa gbaaw, zeene gona me znuse bichew, per bdziel pa niolana lo me. ¹²Grēse zha ne brieegand glo ga, zigtaa zha nona, zigtaa zha wina, laa zho bdziṅ lo me.

Laa zho ndxie ga, zeene laa lo bla libr co bzhial, ni bzhialaque lo miṅe quia lë zha ne bgaa guielmban cub ne rdeed Dios ga; hor co bgaase zho miṅe rieguial zho tib tib zho tel zha zhobnee lo libr co wban zho. ¹³Grēse zha ne biaan leṅ nisdoo, blieequia nisdoo zho, grē zha ne bioliu blieequia baa zho; grēse zho blieequia guielgut zho.

¹⁴⁻¹⁵Blozh ga, zigtaa guielguta, zigtaa zha ne quiad lë leṅ libr ne no lë zha ne bgaa guielmban ga, laa zho biobe lo gui dox ne nac gabıl; lëē guielgut brop ga.

21 Dzigo goṅ naa tib gbaa cub, ni tib guidzliu cub; sac zigtaa gbaa ne rdziuunbey ne, zigtaa guidzliuw, zigtagaa nisdoo grēsew bnitlo. ²Grop lo naa goṅ naa laa Jerusalén, guiedz ne nacchen Dios ga, ziad-zëeb zhan gbaa brieew zaatne zob me; tib guiedz cuba. Tib guiedz nzhixcuaa naca, pale tib ndzoop nguieg dze ne rtsieelna zho. ³Dzigo bin naa nguiedz zëeb tib tsi men co zaatne nac lo xcan ro ne zo gbaa ga, rnee me:

—Nasi nagon laa Dios cuëz lo miech, nasi laa me gbannie zho; zanlo zho me, peet gunfaltraade lo zho. ⁴Led yedraa niina pa glunë zho, led yedraa niina tsoxtseeb zho lo guielgut, led yedraa niina mban gac zho cuedz zho dien cho guṅ xyudar zho, led yedraa niina goon zho; grēse nis ne zo lo zho zeene biin zho, niina laa me guṅmbew. Grēse ncuuan co, gdziṅdraa dze gan zhow.

⁵Zëeb tsi men ne zob lo xcan co, rnee me:

—Grëse ncuuane no niina ncuble naca, ni naa beenncuba.

Blozh ga, nëchaa me lo naa:

—Grëse diidz ne gni naa lo luu nu niina gon, pquiaaw, ib none gacnan miecha, sac ncuuane no gaca. ⁶İLëew nagon, grëse mine no gac, laaw blozh beñ naa! Naa psilow, ni naa psiaaļa, naa nac zigne nac letr “a” ni letr “z” lo grëse letr, “a” rsilow “z” rialļa.

⁷İZha ne në r nab zhis, naa gded nis ne rdeed guielmban guie zho, ygad naa nis co lo zho, peet gacnonda! ⁷Ni golgacnan ganle, grëse zha ne gdeete diidz lo grë ncuuane gunctal xtoļ zho, ible zгаа zho grë guielnzaac ne noyaquiet nu, naazhal gbannie zho peet gunfalte lo zho, masaque tib mëed gac zho lo naa. ⁸Sangue grë zha ne rdzieb gban zigne rnabey naa, grë zha ne rbiche lo naa, grë zha ne run grë ncuuan mbixladz, grë zha ne rut samiech, grë zha ne rionie zha ne led tsieeld zho, grë zha ne rleynie guielbruj, grë zha ne rleynie grë mdio, grë zha ne tibaque noquidie samiech, grëse zha co mine yгаа zho nac lo gui dox ne noyec zufr ga; lëe guielgut brop ga.

Guiedz ne gdziņ zha ne ngab lo Dios

⁹Lo gza gadz anļ ne bzhen cop ne bio grë guielnë ne gon miech ga, biaadgax tib me lo naa në me:

—Dë ganle zeena gan luu ndzoop nguieg ne gac tsieel men ne nac Xcarner yeen Dios i.

¹⁰Blozh ga, dzigo güeynie anļ co naa tib guic gui nroob, tib guic gui glaa, ga gon naa guiedz Jerusalén stib, guiedz ne nacchen Dios ga, gonpaa naa bieta zaatne zob Dios, laaw ziad-zëeb gbaa. ¹¹Masaque rbebela guielndzon ne rap me, lëedaa grë quie niazh ne lë jasp, ni roļ rnaw lëedaa grë vidr. ¹²Rna tib biedz nroob, tib biedz glaa ndze igow, quia tsiipchop puert cho biedz co, tibga anļ zo quianap tib tib ro puert co, tib tib puert co neysew tib lë mengoldoo ne goc xpëed Israel. ¹³Tson puert co quia nëz ya, tsona quia nëz guiet, tsona quia ngali nëz ne rlan ngbidz, stsona quia ngali nëz ne rzëeb ngbidz. ¹⁴Lo tsiipchop quie nroob ne zob biedz co, tibga lë xpoxtl men ne nac Xcarner yeen Dios ga quia lo co.

¹⁵⁻¹⁶Rlupaa cuadrad niaa guiedz co; dzigo gon naa no tib bar ne rbix nia anļ co, niaaw niapse guuib or, psilo me ptiix me guiedz co, ptiix me biedz ne ndze igow ga, ni ptiix me xpuerta. Zeene blozh ptiix mew, tib tib nëza no gaay gayoo choo kilómetro, lal ne rzëni miech tsiipchop ngbidz; lal ne zioola lalga nzhenā, ni lalgaque glaaw; ¹⁷laa xquielnaal biedz co nzhenā lal ne rgaa tsiipchop docen dzit nia ne; ptiix mew zigne rtiixaque ne nac ne miech.

¹⁸Niapse guuib or niaa guiedz co, zigne rne naa ga, roļ rnaw lëedaa vidr. ¹⁹⁻²⁰Biedz ne ndze igow ga, niapse quie niazh ne lë jasp niaaw; scaque gza tsiipchop quie ne naaz biedz co, niapse quie niazh ngalguieew:

tiba ngalguiee quie niazh ne lë jasp,
tiba ngalguiee quie niazh ne lë zafir,
tiba ngalguiee quie niazh ne lë ágata,

tiba ngalguiee quie niazh ne lë smerald,
 tiba ngalguiee quie niazh ne lë ónice,
 tiba ngalguiee quie niazh ne lë cornalin,
 tiba ngalguiee quie niazh ne lë crisólito,
 tiba ngalguiee quie niazh ne lë beril,
 tiba ngalguiee quie niazh ne lë topás,
 tiba ngalguiee quie niazh ne lë crisoprás,
 tiba ngalguiee quie niazh ne lë jacint,
 tiba ngalguiee quie niazh ne lë amatist.

²¹Gza tsiipchop puert ne quiaw ga, tibga quie perl niaa tib tib puert co; nëzyu ne rded groḷ guiedz co, niapse guiib or niaaw, masaque mbe roḷ rñaw.

²²Ni tib yadoo gonḍ naa, sac dipse lad guiedz co rleynie zho Dios, rleynie zho men ne nac Xcarner yeen me. ²³Led yedraa ga rquiin xbiini ngbidz, rquiin xbiini mëë, sac masaque xquielndzon me, ni xquielndzon men ne nac Xcarner yeen me ga nac biini.

²⁴Grëse miech ne ngab lo me, ine gziini biini co lo zho së zho lad guiedz co; zha ne bnabey grë guiedz ne bre lo guidzliu, bio dze zha goc zha non, per zeene gdziḅ zho ga ye zho zunnon zho me. ²⁵Led yedraa ga ycow liu, tibaque niini gnaw, tibaque gzhial gza xpuerta. ²⁶Grëse ncuaane mbe ne gocnon lo grë guiedz ne bre lo guidzliu, laaw gdziḅ ga; ²⁷sangue grë ncuaane mbixladz gdziḅda ga. Zig nac grë miech ne run grë guielntseeb, grë zha ne tibaque noquidie, gdziḅd zhow; loxaque zha ne zhoob lë len xlibr men ne nac Carner yeen co (libr ne no lë zha ne yгаа guielmban cub ne gdeed Dios ga), zha cose gdziḅa.

22 Blozh ga, blu anjl co tib guiubee lo naa, në me zha ne guie nis co, zгаа zho guielmban; mbe roḷ rñaw, haxta rbebel low. Merse zhan xcan ne zob Dios ni zhan xcan ne zob men ne nac Carner yeen co, ga rriee guiubee co, ²rdeda groḷtaa nëzyu ne rded len guiedz co. Gropse nëz ro guiubee co zëëb yag ne rdeed guielmban, gzobse mëë rquia nex low, tsiipchop vuilt rdeda nex tib len iz, haxta ye zhiblaga rquiin grë zha ne no ga, parne sacnëd zho.

³Led yedraa ga no ncuaane ndziibdee, ga zo zhixcan Dios ni zo zhixcan men ne nac Carner yeen co; grëse miech ne ngab lo me, rleynie zho me runnon zho me. ⁴Raḅlo zho me, grëse zho quia lë me quia zho. ⁵Led yedraa ga yquiin zho pe gziini lo zho, yquingaa zho xbiini ngbidz, sac Dioszhal rziini lo zho, led yed ga ycow liu; ga gban zho gdziḅdraa dze ne gree zho ga.

Ile ziaad Jesús

⁶Dzigo nëchaa anjl co lo naa:

—Grëse ncuaane quiaayan luu nu, ible ncuaane no gaca. Bui ganle Dios men ne rdeed guielbiini lo grë zha ne rieteed xtiidz me lo miech, rnee zho ncuaane naraa gac, mezhal pxeel xanj me ziadnee lo luu, zeena gacnan grëse zha ne ngab lo me ziaadyoble gac grë ncuaan rii. ⁷Ible nacle xtiidz men ne rnabey ne, zhile laa me guiaad. ¡Dichos grë zha ne gililadz grë miḅe noxobnen Dios nu!

⁸Grop lo naa gon naa grë ncuuan rii, naazhal bin znu bnee anjl co. Nacne pquitsgzhìb naa lo me ni naa gunnon naa me; ⁹dzigo nëchaa me lo naa:

—Guso i, rieguaìd gunnon luu naa, laa naa nile lo luu ye naa tib ngundziinse nac naa lo Dios, nac naa zigne nacaque luu grë luu grë zha ne noteed xtiidz men ne rnabey ne lo miech, ni grëraa zha ne gliladz minë noxobnen me nu. Me none gunnon luu.

¹⁰Blozh ga, nëchaa me:

—Bien, grëse minë quiayan luu nu, yqueetsd luuw, sac zhile gdziñ dze ne gaca. ¹¹Lo spalalse dze ne riaan niina, grë zha ne noyun guieìntseeb, telne racladz zho mazdraa guieìntseeb ne gun zho, maase gun zhow; zha ne rungaa guieìyozh, telne mincota rleynie zho, maase gunraa zhow. Sangue grë zha ne noxco gun minë rnabey Dios, none tsoxcoraa zhow; zha ne ngablegaa lo me, none gunraa zho minë racladz me, gbiched zho lo me.

¹²Hor co bin naa tsi men ne nac Carner yeen co, në me:

—Psoladza sca gon, ible ziaìniob naa; zeene laa naa guaì, hor co gded naa minë rieguaì tib tib miech, tel zha wban zho. ¹³Notaque naa, zig nac grë ncuuan rii naa psilow ni naa csiaaì; nac naa zig nac letr “a” ni letr “z” lo grë letr, “a” rsilow, “z” riaì. ¹⁴Dichos grë zha ne noxco guaianmbe zho nëz lo Dios, sac rrieequia xab zho ga nosanmbe zho, parne grieelo ted zho ro puert ne quia guiedz cub ne nac Jerusalén ga; gdziñ zho ga ine gow zho xnex yag ne rdeed guieìmban ga. ¹⁵Sangue grë miech ne racntseeb lo Dios, zha ne rleynie guieìbruj, zha ne rionie zha ne led tsieeld, zha ne rut samiech, zha ne rleynie grë mdio, zha ne loxaque noquidie samiech, ni tib zha co grieelod ted ro puert co.

¹⁶Naa gon nac Jesús, naa pxel xanjì naa ziaadlu grë ncuuan rii lo luu, zeena grëse zha ne no xnëz naa gacnaa. Naa ga brieequia lo xtii rey David, per naa psan grëse xmen gol me. Rrieequia naa nac mel ngol ne rziini raì sil.

¹⁷Zigtaa Espíritu Sant, zigtaa grë zha ne no xnëz me, zha ne rrieequia gac tsieel me ga, laa zho quiambëz me; niicle zha ne gacnanragaa laa me no guaìad, none yquiambëz zho me. Zha ne në rnab zhis, telne gacladz zho zac gbig zho lo me, me gdeed nis ne rdeed guieìmban guie zho; ygad me nis co lo zho, peet gacnonda.

¹⁸Grëse zha ne gon grë minë pxobnen Dios nu, laa naa rso diidz lo zho: Gneed zho ncuane nacda, sac zha ne gdziibbraa diidz zeene gnee zhow, scagaa me, lo grë guieìnë ne raquiet nu ygaa miech, zdziibbraa me minë ygaa zho; ¹⁹zha ne ctichegaa palala zeene gnee zhow, scaque stiche me lë zho lo libr ne zhobnee cho nac zha ne ygaa guieìmban ne gdeed me, grieelodraa gdziñ zho guiedz ne blozh goquiet nu, ygaadraa zho yquiin zho xnex yag ne rdeed guieìmban ga.

²⁰Men ne blozh bnee lo naa ga, ible ziaadniob me rnee me. Gacxe waa, dib zdoonaa laa naa rne lo me nu:

—¡Scaw gon Jesús! ¡Dë, laa no quiambiaaz luu!

²¹Me nac men ne gacniën to grëse to, me gunlay to. *Juan*